

Z A P I S N I K

Sa 37-me redovne sjednice Skupštine Bosansko-podrinjskog kantona Goražde održane 30. juna 2010. godine u sali Skupštine Bosansko-podrinjskog kantona Goražde sa početkom u 10:00 sati.

Sjednici Skupštine Bosansko-podrinjskog kantona Goražde prisustvuje 20 poslanika, i to: poslanici Stranke demokratske akcije: Begović Alija, Đozo Hasan, Mulahmetović Mirsad, Halilović Adis, Ferhatović Jasmin, Obuća Bajro, Agović Adis i Borović Mensud, poslanici Stranke za Bosnu i Hercegovinu: Turčalo Mehmed, Rahman Ferid, Adžem Memsur i Kumro Mesud, poslanici Socijaldemokratske partije Bosne i Hercegovine: Bašić Redžo, Mujković Dževida, Frašto Emir, Imamović Ibrahim i Bilić Dragomir, poslanik Bosanskohercegovačke patriotske stranke – Sefer Halilović Terović Dževad, Milović Daliborka, poslanica Stranke radom za boljitak i Tafro Hasan nezavisni poslanik u Skupštini Bosansko-podrinjskog kantona Goražde.

Sa sjednice odsutni: poslanici Stranke za Bosnu i Hercegovinu: Džemidžić Envera, Žuga Damir i Omerbašić Jasmina, poslanik poslanik Socijaldemokratske partije Bosne i Hercegovine Kožo Mersudin i nezavisni poslanik Podrug Salko.

Pored poslanika Skupštine Bosansko-podrinjskog kantona Goražde sjednici prisustvuju: Premijer Bosansko-podrinjskog kantona Goražde Uruči Nazif, sekretar Skupštine Bosansko-podrinjskog kantona Goražde Bašić Midhat, sekretar Vlade Bosansko-podrinjskog kantona Goražde Sijerčić Emir, ministri u Vladi Bosansko-podrinjskog kantona Goražde: Pleh Muhidin, Kurtović Mustafa, Imamović Demir, Adžem Dževad, Imamović Demir, Sipović Nusret i Delizaimović Alma, predstavnik Ministarstva za finansije Ratković Nijaz, predstavnik Ministarstva za privredu Muratspahić Meho, direktor Kantonalnog stambenog fonda Šunja Ahmed, direktorica J.U. Služba za zapošljavanje Bosansko-podrinjskog kantona Goražde Hodo Nafija, direktor „Doma za stara i iznemogla lica Goražde“ Kuljuh Kemal, direktor Kantonalne uprave za inspeksijske poslove Hadžiomerović Mithat, predstavnik Kantonalne uprave za inspeksijske poslove Sudić Memsur, direktor Zavoda za javno zdravstvo Goražde Jahić Ibrahim, predstavnici Njemačkog LOT tima, predstavnici OHR-a, predstavnici EUPM-a, te predstavnici sredstava javnog informisanja.

Skupštinom Bosansko-podrinjskog kantona Goražde predsjedava predsjedavajući Skupštine Alija Begović, a zapisnik vodi Burhan Safeta.

Begović Alija – predsjedavajući Skupštine

Zapisnik sa 36-te redovne sjednice Skupštine ste dobili. Otvaram raspravu. Da li ima primjedbi? Pošto se niko ne javlja za riječ zaključujem raspravu i konstatujem da na zapisnik sa 36-te redovne sjednice Skupštine Bosansko-podrinjskog kantona Goražde nema primjedbi, te da je u skladu sa Poslovníkom Skupštine zapisnik usvojen.

Kolegij Skupštine Bosansko-podrinjskog kantona Goražde za današnju sjednicu predložio je slijedeći:

D n e v n i r e d

- 1/ Vladin sat – poslanička pitanja i inicijative,
- 2/ Prijedlog Zakona o unutrašnjim poslovima Bosansko-podrinjskog kantona Goražde,
- 3/ Nacrt Zakona o inspekcijama u Bosansko-podrinjskom kantonu Goražde,
- 4/ Prijedlog Odluke o sigurnosti i organizaciji saobraćaja na putevima Bosansko-podrinjskog kantona Goražde,
- 5/ Prijedlog Odluke o vršenju taxi prijevoza na području Bosansko-podrinjskog kantona Goražde,
- 6/ Izvještaj o radu Vlade Bosansko-podrinjskog kantona Goražde za 2009. godinu,

- 7/ Izvještaj o izvršenju Budžeta Bosansko-podrinjskog kantona Goražde za 2009. godinu,
- 8/ Izvještaj o utrošku budžetske rezerve Bosansko-podrinjskog kantona Goražde za period 01. 01. – 31. 12. 2009. godine,
- 9/ Izvještaj o radu J.U. Služba za zapošljavanje Bosansko-podrinjskog kantona Goražde za 2009. godinu i Izvještaj o izvršenju finansijskog plana J.U. Služba za zapošljavanje Bosansko-podrinjskog kantona Goražde za 2009. godinu,
- 10/ Izvještaj o radu J.U. Zavod zdravstvenog osiguranja Bosansko-podrinjskog kantona Goražde i Izvještaj o izvršenju Finansijskog plana J.U. Zavod zdravstvenog osiguranja Bosansko-podrinjskog kantona Goražde za 2009. godinu,
- 11/ Izvještaj o radu J.U. Centar za socijalni rad Bosansko-podrinjskog kantona Goražde i Program rada J.U. Centar za socijalni rad Bosansko-podrinjskog kantona Goražde za 2010. godinu,
- 12/ Izvještaj o radu srednjih škola na području Bosansko-podrinjskog kantona Goražde za 2009. godinu,
- 13/ Izvještaj o radu osnovnih škola na području Bosansko-podrinjskog kantona Goražde za 2009. godinu,
- 14/ Izvještaj o radu J.P. RTV Bosansko-podrinjskog kantona Goražde za 2009. godinu,
- 15/ Godišnji operativni i finansijski Izvještaj o radu J.U. “Dom za stara i iznemogla lica” Goražde za 2009. godinu,
- 16/ Godišnji operativni i finansijski Izvještaj J.Z.U. Kantonalna bolnica Goražde za 2009. godinu,
- 17/ Izvještaj o radu i finansijskom poslovanju J.U. Zavod za javno zdravstvo Bosansko-podrinjskog kantona Goražde za 2009. godinu,
- 18/ Informacija o stanju u oblasti kulture na području Bosansko-podrinjskog kantona Goražde,
- 19/ Prijedlog Deklaracije o ravnopravnosti Bosansko-podrinjskog kantona Goražde u Federaciji Bosne i Hercegovine.

Begović Alija – predsjedavajući Skupštine

Otvaram raspravu po predloženom dnevnom redu. Ko se javlja za riječ?

Predlažem da se tačka 19. Prijedlog Deklaracije o ravnopravnosti Bosansko-podrinjskog kantona Goražde u Federaciji Bosne i Hercegovine stavi iza Izvještaja o utrošku budžetske rezerve Bosansko-podrinjskog kantona Goražde za period 01. 01. – 31. 12. 2009. godine.

/Na sjednicu došli poslanici Stranke za Bosnu i Hercegovinu Džemidžić Envera i Omerbašić Jasmina, te nezavisni poslanik u Skupštini Bosansko-podrinjskog kantona Goražde Podrug Salko. Sjednici prisustvuje 23 poslanika/.

Turčalo Mehmed – Ja sam na sjednici Kolegija Skupštine tražio bezuslovno da se na današnji dnevni red usvrsti tačka dnevnog reda: Izvještaj o radu J.P. Bosansko-podrinjske šume obzirom da se danas završava pola ove kalendarske godine. Za Klub poslanika Stranke za Bosnu i Hercegovinu neprihvatljiv je ovakav dnevni red bez ovog Izvještaja.

Bašić Redžo – u ime Kluba poslanika Socijaldemokratske partije Bosne i Hercegovine predlažem da se tačka 3. Nacrt Zakona o inspekcijama u Bosansko-podrinjskom kantonu Goražde skine s dnevnog reda današnje sjednice Skupštine. Svi koji su pročitali materijale imali su priliku da vide mišljenje Ministarstva za pravosuđe, upravu i radne odnose koje kaže da je u proceduri donošenje Federalnog Zakona o inspekcijama. Predlažemo da se ovaj Zakon odloži dok se ne donese Federalni Zakon o inspekcijama koji će sigurno promijeniti i donijeti nove obaveze Kantonu i da onda pristupimo donošenju našeg Zakona o inspekcijama.

Predlažemo da se uvrsti nova tačka dnevnog reda: Prijedlog Odluke o utvrđivanju niskoakumulativnih djelatnosti tradicionalnih esnafskih zanata. Ukoliko se ovaj materijal ne može obezbijediti za ovo zasjedanje Skupštine, predlažemo da se sa današnjem zasjedanja povuče tačka 5. Prijedlog Odluke o vršenju taxi prijevoza na području Bosansko-podrinjskog kantona Goražde i da ove dvije odluke budu na prvom narednom zasjedanju kako bi ova Skupština imala isti tretman prema obrtnicima i taksistima.

Ovo potkrepljujem činjenicom da u odgovoru na poslanička pitanja i inicijative koji je dostavljen od 14. 06. 2010. godine Ministarstvo za privredu piše da je pripremilo i uputilo u proceduru donošenje Nacrta Odluke o utvrđivanju niskoakumulativnih djelatnosti tradicionalnih esnafskih zanata. Gdje je zastala ta Odluka neka se očituju oni na koje se odnosi.

Frašto Emir – Klub poslanika Socijaldemokratske partije Bosne i Hercegovine

Nama nije jasno zašto Prijedlog Odluke o sigurnosti i organizaciji saobraćaja na putevima Bosansko-podrinjskog kantona Goražde je upućen na razmatranje Skupštini Bosansko-podrinjskog kantona Goražde. Pod tačkom 42. Programa rada Skupštine Bosansko-podrinjskog kantona Goražde za 2010. godinu utvrđeno je da se u I tromjesečju razmatra: Rješavanje problema mirujućeg saobraćaja, parkiranje vozila u centru grada. Pod tačkom 117. Programa rada Skupštine utvrđeno je da se u IV tromjesečju razmatra: Odluka o sigurnosti i bezbjednosti saobraćaja na području Bosansko-podrinjskog kantona Goražde. Obzirom da je tačka: Rješavanje problema mirujućeg saobraćaja usko vezana sa Odlukom o sigurnosti i bezbjednosti, odnosno organizacija saobraćaja iz čijih odredbi proizilazi donošenje akta o mirujućem saobraćaju, odnosno parkiranja vozila, neophodno je pomjeriti termin donošenja Odluke o sigurnosti i organizaciji saobraćaja na putevima Bosansko-podrinjskog kantona Goražde. Znači, ovdje je upitno kako je riječ „bezbjednost“ prešla u riječ: „organizacija“. Nespojivo. Znači, sasvim drugu tematiku, po meni, a i nama, to predstavlja. To ova Odluka ne rješava i uopšte ne dira tu bezbjednost saobraćaja već govori dijelom o organizaciji saobraćaja. Mi tu Odluku imamo i čini mi se da je ova kraća i manje govori nego postojeća Odluka koja je detaljnija i daje više mogućnosti. Klub poslanika Socijaldemokratske partije Bosne i Hercegovine predlaže da se tačka 4. Prijedlog Odluke o sigurnosti i organizaciji saobraćaja na putevima Bosansko-podrinjskog kantona Goražde skine s današnjeg dnevnog reda.

Obuća Bajro – predsjednik Kluba poslanika Stranke demokratske akcije

Vezano za Nacrt Zakona o inspekcijama u Bosansko-podrinjskom kantonu Goražde moram istaći da je nekoliko godina bio u Programa rada Skupštine, a evo prvi put je predložen. Jeste Federalni Zakon u proceduri, ali koliko godina? Kada će se donijeti? Klub poslanika Stranke demokratske akcije je zato da se krene u donošenje Kantonalnog propisa. Naravno, u međuvremenu ako se Federalni propis donese i nametne neke druge obaveze koje nisu propisane Kantonalnim, to se uvijek može regulisati izmjenama i dopunama.

Klub poslanika Stranke demokratske akcije traži pauzu od 15 minuta kako bi zauzeo stav po iznešenim prijedlozima vezano za dnevni red.

Imamović Ibrahim – Potpuno podržavam kolegu Turčala vezano za Bosansko-podrinjske šume. Kakva je odgovornost uprave, odnosno upravnih organa Bosansko-podrinjskih šuma zašto Izvještaj nije bio do sada. Kaže se da se tek konstituiše Skupština. Šta se čekalo? Koje su prepreke bile? Da li ova Skupština bila prepreka? Da li je Zakon bio prepreka? Da se ispita odgovornost odgovornih, da se smjeni direktor i Upravni odbor. Da se postave novi ljudi i da konačno neko odgovara prema ovoj Skupštini zašto ne izvršava zadatke.

Begović Alija – predsjedavajući Skupštine

Na zahtjev Kluba poslanika Stranke demokratske akcije dajem pauzu od 15 minuta.

/Završena pauza/

Begović Alija – predsjedavajući Skupštine

Zamolio bih Vladu Bosansko-podrinjskog kantona Goražde da se očituje o prijedlozima za izmjenu i dopunu dnevnog reda današnje sjednice Skupštine

Kurtović Mustafa – ministar za privredu u Vladi Bosansko-podrinjskog kantona Goražde

Mišljenja smo da treba sa današnje sjednice Skupštine povući: Prijedlog Odluke o sigurnosti i organizaciji saobraćaja na putevima Bosansko-podrinjskog kantona Goražde iz razloga što su u petak stupile na snagu izmjene i dopune Zakona o bezbjednosti saobraćaja i time se stvaraju pretpostavke za dopunu ove Odluke.

Takodjer tačka 5. Prijedlog Odluke o vršenju taxi prijevoza na području Bosansko-podrinjskog kantona Goražde, obzirom da je Ministarstvo u međuvremenu, tačnije 7. 06. 2010. godine već pripremlilo tu Odluku uz saglasnost sa predstavnicima Udruženja stari zanati i Obrtničkom komorom smatramo da je cjelishodnije da se i ova Odluka danas ne razmatra.

Begović Alija – predsjedavajući Skupštine

Budući da je to poslovničko pravo Vlade kao predlagača da povuče svoje prijedloge, ove dvije tačke možemo smatrati povučenim, a prijedloge poslanika koji su to tražili prihvaćenim.

Ostaje nam još da se očitujemo o prijedlogu g-dina Bašić Redža da se s dnevnog reda skine tačka 3. Nacrt Zakona o inspekcijama u Bosansko-podrinjskom kantonu Goražde. Vlada je preporučila da se o njemu, ipak, raspravlja jer je u formi nacрта. Da li Klub Socijaldemokratske partije prihvata ovo obrazloženje ili ćemo se izjašnjavati o prijedlogu da se tačka 3. skine s dnevnog reda.

Klub poslanika Socijaldemokratske partije Bosne i Hercegovine odustaje od prijedloga za skidanje s dnevnog reda 3-će tačke: Nacrt Zakona o inspekcijama u Bosansko-podrinjskom kantonu Goražde.

/Na sjednicu došao poslanik Žuga Damir/

/Sjednici prisustvuje 24 poslanika/

G-din Turčalo je tražio da se u dnevni red uvrsti: Izvještaj o radu J.P. Bosansko-podrinjske šume. Dobili smo obrazloženje. Možemo ga prihvatiti ili ne, ali Izvještaj nije spreman u ovom trenutku.

G-din Imamović je, takodjer, govorio o Izvještaju o radu J.P. Bosansko-podrinjske šume. Imat ćemo tačku dnevnog reda: Vladin sat – poslanička pitanja i inicijative pa, eventualno, ako ima nekih inicijativa mogu se iznijeti u okviru ove tačke dnevnog reda.

Ja sam predložio, da se Deklaracija, obzirom na njenu važnost i značaj kao dokumenta, razmatrao kao 7-ma tačka dnevnog reda.

Ko je za, molim, da digne ruku? /22 poslanika/

Ima li neko protiv? /Niko/

Da li se neko uzdržao od glasanja? /2 poslanika/

Konstatiram da je sa 22 glasa „za“, niko protiv i 2 „suzdržana“ glasa prihvaćen prijedlog da se Prijedlog Deklaracije o ravnopravnosti Bosansko-podrinjskog kantona Goražde u Federaciji Bosne i Hercegovine razmatra kao 7-ma tačka dnevnog reda.

Ostaje nam da se izjasnimo o izmjenjenom dnevnom redu.

Ko je za, molim, da digne ruku? /19 poslanika/

Ima li neko protiv? /Niko/

Da li se neko uzdržao od glasanja? /5 poslanika/

Konstatiram da je Skupština Bosansko-podrinjskog kantona Goražde, sa 19 glasova „za“ i 5 „uzdržanih“ glasova usvojila slijedeći:

D n e v n i r e d

- 1/ Vladin sat – poslanička pitanja i inicijative,
- 2/ Prijedlog Zakona o unutrašnjim poslovima Bosansko-podrinjskog kantona Goražde,
- 3/ Nacrt Zakona o inspekcijama u Bosansko-podrinjskom kantonu Goražde,
- 4/ Izvještaj o radu Vlade Bosansko-podrinjskog kantona Goražde za 2009. godinu,
- 5/ Izvještaj o izvršenju Budžeta Bosansko-podrinjskog kantona Goražde za 2009. godinu,
- 6/ Izvještaj o utrošku budžetske rezerve Bosansko-podrinjskog kantona Goražde za period 01. 01. – 31. 12. 2009. godine,
- 7/ Prijedlog Deklaracije o ravnopravnosti Bosansko-podrinjskog kantona Goražde u Federaciji Bosne i Hercegovine.
- 8/ Izvještaj o radu J.U. Služba za zapošljavanje Bosansko-podrinjskog kantona Goražde za 2009. godinu i Izvještaj o izvršenju Finansijskog plana J.U. Služba za zapošljavanje Bosansko-podrinjskog kantona Goražde za 2009. godinu,
- 9/ Izvještaj o radu J.U. Zavod zdravstvenog osiguranja Bosansko-podrinjskog kantona Goražde i Izvještaj o izvršenju Finansijskog plana J.U. Zavod zdravstvenog osiguranja Bosansko-podrinjskog kantona Goražde za 2009. godinu,
- 10/ Izvještaj o radu J.U. Centar za socijalni rad Bosansko-podrinjskog kantona Goražde i Program rada J.U. Centar za socijalni rad Bosansko-podrinjskog kantona Goražde za 2010. godinu,
- 11/ Izvještaj o radu srednjih škola na području Bosansko-podrinjskog kantona Goražde za 2009. godinu,
- 12/ Izvještaj o radu osnovnih škola na području Bosansko-podrinjskog kantona Goražde za 2009. godinu,
- 13/ Izvještaj o radu J.P. RTV Bosansko-podrinjskog kantona Goražde za 2009. godinu,
- 14/ Godišnji operativni i finansijski Izvještaj o radu J.U. “Dom za stara i iznemogla lica” Goražde za 2009. godinu,
- 15/ Godišnji operativni i finansijski Izvještaj J.Z.U. Kantonalna bolnica Goražde za 2009. godinu,
- 16/ Izvještaj o radu i finansijskom poslovanju J.U. Zavod za javno zdravstvo Bosansko-podrinjskog kantona Goražde za 2009. godinu,
- 17/ Informacija o stanju u oblasti kulture na području Bosansko-podrinjskog kantona Goražde.

Tačka 1.-

Prelazimo na 1-vu tačku dnevnog reda: Vladin sat – poslanička pitanja i inicijative.

Begović Alija – predsjedavajući Skupštine

Pozivam poslanice i poslanike koji nisu dobili odgovore, odnosno koji nisu u potpunosti dobili odgovore na postavljena pitanja da iznesu primjedbe.

Džemidžić Envera – Na 36-toj redovnoj sjednici Skupštine postavila sam poslaničko pitanje i inicijativu zajedno, a vezano je za jedno pismo koje su Skupštini Bosansko-podrinjskog kantona Goražde uputili građani Lozja, odnosno u tom pismu se potpisao Muhamed Sijerčić i tražio je da pitamo Tužilaštvo, jer nisu bili zadovoljni jednom informacijom koja je išla na medijima vezano za zločine u Lozju u prošlom ratu. Bilo je pitanje šta je uradjeno po pitanju procesuiranja odgovornih za ratni zločin u Lozju. Evidentirano je da je Tužilac na lokalnoj televiziji rekao da su uradjene istražne radnje i da su papiri poslani na Federalni nivo, možda i na Državni, ne znam. Ja sam od gospodina tužioca Mirsada Bilajca dobila odgovor koji, osjećam da moram prokomentarisati. Odgovor je nedorečen. Tužilac navodi da je Tužilaštvo uradilo ono što je trebalo da uradi i svi predmeti koji su ocijenjeni kao vrlo osjetljivi dostavljeni su Tužilaštvu BiH, a oni koji nisu bili vrlo osjetljivi shodno Zakonu dostavljeni su mjesnim tužilaštvima na nadležan postupak. Vjerovatno se radi o vrlo osjetljivom i poslat je na Tužilaštvo BiH. Nudi se Tužilac da dodje na sjednicu Skupštine i da sam objasni sve ovo. Ja molim vas poslanike da me podržite, da podržite ljude koji su reagirali na ovaj zločin, da omogućimo Tužiocu da dodje na naredno skupštinsko zasjedanje. U njegovom odgovoru stoji: „Nebrojeno puta sam objašnjavao šta još ostaje u zadatku ovom Tužilaštvu tako da više neću objašnjavati, a ukoliko poslanici smatraju da treba da im kažem to direktno onda nek odrede jedan termin kada žele da budem prisutan i da jednom objasnim da ovo Tužilaštvo je uradilo sve ono što mu Zakon nalaže“. Znači, trebalo bi pozvati Tužioca i dati mu mogućnost da kaže to za ovom govornicom danas u 13 sati.

Begović Alija – predsjedavajući Skupštine

Ja bih predložio da možda, ipak, imate svog člana u Kolegiju Skupštine ispred stranke predložimo da na narednoj sjednici Skupštine jedna od tačaka može biti Izvještaj ili Informacija po ovom pitanju, kako se dogovorimo. Ja se slažem da treba i o tome raspravljati i podržao bih da se na slijedećoj sjednici uvrsti ta tačka ili da u okviru poslaničkih pitanja otvorimo podtačku, kako inače imamo praksu u slučajevima kada to poslanik traži.

Frašto Emir – Mene je ovo pismo ponukalo na neku nelagodu. Pismo je puno neke veličine i nepoštovanja. Mislim da naša kolegica g-đa Džemidžić Envera je bila blaga u ovoj ocjeni. Znači, mi podržavamo da se i danas Tužilac pozove. Na kakav se način Tužilac obraća Skupštini i našoj kolegici Džemidžić Enveri. Šta je vrlo osjetljivo. Sve su te stvari važne i treba nam objasniti. Imamo pravo to da znamo. Koji su to procesi? Ovdje se priče pričaju odavno a ništa se ne radi. Insistiramo na tome da Tužilac dodje, ali je neprimjereno da ovako stoji u ovom dopisu: „Iz Vašeg dopisa vidi se da Džemidžić Envera ...“. Ko je ta Džemidžić Envera? G-đa poslanik, to treba da piše isto kao što ovdje piše da je čovjek glavni Tužilac. Znači, g-dine Glavni tužioče tražimo od vas da se uvažavamo. U čitavom dijelu stoji, ja sam vama pisao, ja sam se vama obraćao, molim vas da svi ovo pročitate, ja ću dio da pročitam: „Obavještavamo Vas da sam nebrojeno puta i putem štampe i TV-a pojasnio zašto ovo Tužilaštvo nije procesuiralo predmete ratnog zločina...“. To znači mi smo radili, slomili smo se radeći, a vidi li iko efekat od toga bili to Srbi ili Muslimani. Koga su oni procesuirali? Dalje stoji u ovom odgovoru: „Iz Vašeg dopisa vidi se da Džemidžić Envera navodi da je Tužilac na lokalnoj televiziji nedavno rekao da su uradjene istražne radnje i da su papiri poslani na Federalni nivo ...“. Papiri poslani na Federalni nivo, to je ono što on radi i u tom pravcu podržavam ovo i tražimo da Tužilac dodje na sjednicu Skupštine danas u 13 sati.

Agović Adis – Hvala Enveri Džemidžić što traži da danas na sjednicu Skupštine dodje Tužilac i ja se slažem s tim. Ja sam konkretno radio na ovom projektu i da je u Lozju poginulo 32, odnosno 33 civila samo sto što su bili Bošnjaci i nikada niko nije procesuiran u tom smislu. Ja sam u nekoliko navrata razgovarao s ljudima, konkretno sa g-dinom Sijerčićem i nekim drugim koji su radili na Spomen obilježju koje je napravljeno u Kokinom selu i pitao konkretno, međutim nikada niko nije procesuiran. Ja insistiram da danas dodje Tužilac i konkretno kaže šta se uradilo po tom pitanju jer su 32 civila, odnosno 33 poginuli, neki ni do dan danas nisu ni pronađeni. To su izvršili, ja odgovorno

tvrdim, kako oni tvrde i kako oni kažu komšije Srbi koji su živili na tom području u tom periodu 22. maja kada je stradalo 32 civila. Prema tome, ja danas insistiram da dodje g-din Tužioc i da nam kaže šta je konkretno urađeno po tom pitanju, jer je ovo jedinstvena prilika da se možemo svi upoznati, a ne da putem medija i novina mi dobijamo neke plasirane ili neplasirane informacije. Podržavam prijedlog g-dina Frašta Emira i g-đe Envere Džemidžić.

Kumro Mesud – Moram izraziti zadovoljstvo, jer su ovo nažalost rijetki trenuci, kada se mi u Skupštini oko tako važnih stvari složimo i nastojimo da iznadjemo pravo rješenje. Ne bi se ponavljao. Podržavam sve prethodne kolege koji si govorili o ovome, ali bih htio da idem korak dalje i da danas uradimo nešto konkretno, ne samo kada je riječ o ovom strašnom zločinu koji smo sad spominjali, nego da uradimo nešto konkretno kada se radi o zločinima kojih smo većina nas svjedoci, koji su se desili na ovom prostoru u toku cijelog rata. Uvjeren sam da dijelim mišljenje svih nas i svih naših građana da smo ljuti, nezadovoljni, nemam izraza koji bih upotrijebio da kažem ono što svi osjećamo zbog toga što još niko zbog zločina koji su se desili u Goraždu nije osuđen. Molim vas, ako ste zaboravili, ja sam izlazio ovdje sa inicijativom koja je po meni ostvarljiva da ova Skupština donese zaključak o formiranju jednog tijela koje će ispitati zbog čega se nije desilo, a ima na stotine, da ne kažem na hiljade takvih koji su odgovorni za sve ono što smo mi preživjeli u Goraždu u toku rata. Obzirom na moju inicijativu sa kojom sam izlazio prije nekoliko mjeseci, a imamo i poslovničke mogućnosti da danas izglasamo zaključak i formiramo jedno stručnije tijelo koje će sve ovo ispitati, informisati nas poslanike i javnost da konačno dozna malo više oko ovog strašnog problema.

Begović Alija – predsjedavajući Skupštine

Ja kao predsjedavajući trebao bi voditi računa, prije svega, o zakonitosti rada Skupštine i o procedurama propisanim u Poslovniku. Uz potpuno slaganje sa ovim što ste iznijeli mislim da u sadašnjim uslovima nemamo tu mogućnost. Ja bih zamolio predsjednike klubova poslanika da obave konsultacije u svojim klubovima i da mi daju konkretan prijedlog i u tehničkom smislu da li se može danas pozvati Tužilac u 13 sati. Je li to znači da možemo ovu tačku ostaviti otvorenu? Kažu da je Tužilac na godišnjem odmoru. Tema je jako složena, potreban je jako kvalitetan i obiman set informacija. Ja sam sklon, kao i što je rekao g-din Frašto iz klupa da se u roku od 7-10 dana pripremi tematska sjednica o stanju u vezi sa ratnim zločinima, informacija itd. Jako je dobro što se g-din javni Tužilac kao nezavisni organ ponudio Skupštini da nam da tu informaciju i mi bi to mogli rado prihvatiti da se pripremi. Mislim, da je to ozbiljna tačka da bi se ovako ad hok do 13 sati mi mogli ispričati, ali mislim da je daleko kvalitetnije za 7-10 dana kako se dogovorimo planirati takvu sjednicu i takvu tačku, možemo tačno i definirati naslov tačke, jer moramo, voditi računa i o neovisnosti institucije i o pravu našem da budemo informisani o ukupnom stanju i tokovima u našem Kantonu. U tom smislu, da li mogu predsjednici klubova, eventualno, predložiti dopunu ili se složiti sa ovim što sam predložio. Slažete se da se održi tematska sjednica.

Skupština Bosansko-podrinjskog kantona Goražde zaključila je da se tematska sjednica Skupštine održi u roku od 7 do 10 dana ili sjednicu sa jednom tačkom dnevnog reda, a Kolegij Skupštine Bosansko-podrinjskog kantona Goražde definisat će tačku dnevnog reda, koja će se odnositi na stanje u procesuiranje ratnih zločina na području Bosansko-podrinjskog kantona Goražde.

Što se tiče inicijative g-dina Kumra oko formiranja komisije sve ćemo to definirati na sjednici Kolegija i predložiti Skupštini.

Bilić Dragomir – Ja sam na prošloj sjednici pokrenuo dvije inicijative. Jedna se odnosi na komunalnu policiju, a druga na pse lutalice. Nisam dobio odgovor. Rečeno mi je da je to u nadležnosti Općinskog vijeća što ne znači da Kanton ne može izdvojiti sredstva za te namjene. Tražim da mi se pismeno odgovori na ove inicijative.

Kumro Mesud – Prije dva mjeseca postavio sam poslaničko pitanje našim delegatima na Federalnom nivou da nas i javnost upoznaju s onim šta su oni radili u funkciji delegata u Domu naroda i o efektima njihovog rada. Izrazio sam nezadovoljstvo, na prošloj sjednici, zbog toga što

nisam dobio taj odgovor. Izražavam svoje nezadovoljstvo zbog toga i u dilemi sam jesu li oni bili odgovorni vršeći svoju funkciju u Domu naroda, jesu li se trudili da opravdaju povjerenje građana i da izvrše svoju dužnost u toj funkciji. Obzirom da čekamo odgovor već dva mjeseca, meni ne preostaje ništa drugo nego da budem uvjeren da oni gore nisu ništa radili zato što nam nisu ponudili nikakvu informaciju. Zbog toga izražavam svoje najveće nezadovoljstvo zbog toga. Uvjeren sam da su imali puno toga da urade na toj funkciji. Građani Bosansko-podrinjskog kantona Goražde, a mi o tome ovdje često pričamo, trpe zbog diskriminirajućeg odnosa federalnih nivoa prema ovom Kantonu. U tom smislu, mislim da su naši delegati bili u poziciji da najviše urade da se promjeni takav odnos prema ovom Kantonu u smislu predlaganja, pokretanja inicijativa da se konačno preraspodjela od indirektnih poreza sistemski riješi i da ovaj Kanton, odnosno građani ovog Kantona u tom smislu ne trpe ono što već godinama trpe. Mi smo nekoliko puta ovdje spominjali donošenje Zakona o izmjenama i dopunama Zakona o zemljišno-knjižnim uredima i problemima zbog kojih veliki broj naših građana trpe zbog nedonošenja tog Zakona. Neko od kolega je pomenuo problem pasa na našim ulicama. Složit ćete se samnom da je Zakon o zaštiti životinja donesen na Federalnom nivou. Naši delegati su bili dužni da reaguju kod donošenja tog Zakona u smislu da ćemo imati ove probleme koje imamo sad i da se nisu stekli uslovi za donošenje takvog Zakona i zbog njihovog nereagovanja svjedoci smo ružnih slika na našim ulicama i opasnih situacija po građane i djecu ovog Kantona zbog pasa lualica. Dobio sam podatak da je u prošloj godini bili 30 registrovanih ujeđa naših građana u Kantonolnoj bolnici. Ima još puno stvari zbog kojih sam ja nezadovoljan zbog neaktivnosti naših delegata. Mislim da su bili obavezni to raditi i zbog povjerenja koje smo im mi ukazali, a i zbog velikih svota novca koji su uzeli obavljajući te svoje mandate. Te svote prelaze i milion KM.

Begović Alija – predsjedavajući Skupštine

Dao je odgovor na poslaničko pitanje Kumro Mesuda.

Frašto Emir – Ja sam prošli put govorio kako sam shvatio pitanje g-dina Kumra, a u stvari cilj je nečega što je sadržano djelimično u Deklaraciji. Na ovaj način kada neki naš stav, zaključak, inicijativa prodje kroz ovu Skupštinu onda malte-ne ima snagu državnog akta. Bilo bi dobro da tako radimo. Znači, želja mi je bila da ono što mi ovdje donesemo bude obaveza i za Federaciju zato što ona nas ne poštuje. Uzima mnogo naših ingerencija, posebno Zakonom o zdravstvu. Zato je mnogo bolje da se o tome govori na ovaj otvoren način i da to bude zajednička inicijativa, jer u suštini nema ni Federacija pravo da se previše miješa u nadležnost Kantona, a mi joj šutnjom to dozvoljavamo. Prema tome, ja ću na ovaj način da kažem, drugi način mi ne odgovara i mislim da je to već politikanstvo.

Druga stvar koja se tiče mojih pitanja i sa čim sam nezadovoljan, a to je postavljeno pitanje za GIRO „Drinu“ i privatizaciju. Znači, šta je sa sredstvima od 500.000 KM? Molim Vladu da to pitanje ozbiljno shvati i odgovori mi na pitanje gdje su nestala tolika sredstva, posebno što dio tih dioničara uopšte ne zna za ta sredstva? Oni i dalje misle da su ta sredstva podijeljena za onu GIRO „Drinu“ koja je s druge strane granice Bosne i Hercegovine, a ne u drugom entitetu. Dakle, po Zakonu je nemoguće da se sredstva podijele grupi ljudi. Ako je to tačno molim organe da reaguju, a i Vladu da se angažuje na tom, jer to nisu mala niti zanemarljiva sredstva.

Kumro Mesud – Istakao je da nije zadovoljan odgovorom predsjedavajućeg i g-dina Frašta u vezi njegovog pitanja vezanog za rad delegata u Domu naroda Parlamenta Federacije Bosne i Hercegovine i insistira na pismenom odgovoru.

Bašić Redžo – Na 33-ćoj redovnoj sjednici Skupštine Bosansko-podrinjskog kantona Goražde, koja je održana 23. februara 2010. godine pokrenuo sam slijedeću inicijativu:

Da Vlada Kantona pripremi i realizuje projekat preventivnog čišćenja korita rijeke Drine, Prače i Koline sa posebnim akcentom na naseljena mjesta u cilju zaštite stanovništva i njihovih materijalnih dobara od poplava.

Obzirom da smo ovih dana ponovo bili svjedoci da je sjeverni dio Bosne, gotovo jedna trećina bila poplavljena i da su pretrpjeli milionske štete stvarno bi red bio da se jednom ova Skupština informiše hoće li Vlada ovo uraditi i ko će snijeti posljedice ako dodje do padavina na ovom Kantonu i pojave se štete na objektima i materijalnim dobrima.

Agović Adis – Na prošloj sjednici Skupštine postavio sam poslaničko pitanje koje se odnosi na potkrovne stanove. Dobio sam usmeni odgovor od premijera, ali sam insistirao da mi se odgovori i pismeno. Da ona ministarstva, koja su nadležna u skladu sa članom 3. Odluke, a to su Ministarstvo za boračka pitanja, Ministarstvo za socijalnu politiku, zdravstvo, raseljena lica i izbjeglice, Ministarstvo za urbanizam, prostorno uređenje i zaštitu okoline i dijelom Vlada Bosansko-podrinjskog kantona Goražde kažu dokle se stiglo sa realizacijom te Odluke. Je su li urađeni pravilnici, šta se dalje namjerava uraditi, hoće li uopšte u ovoj godini biti dodjele, odnosno prodaje tih stanova itd.? Odgovor tražim u pismenoj formi.

Begović Alija – predsjedavajući Skupštine

Pozivam poslanike da postavite nova poslanička pitanja i inicijative.

Adžem Memsur – Koliko mi je poznato u narednom periodu doći će do rekonstrukcije određenih putnih pravaca, uglavnom se odnose na ruralna, odnosno seoska područja. Na medijima prof. Kurtović je pomenuo te neke putne komunikacije, a nije pomenuta putna komunikacija, odnosno više njih u Mjesnoj zajednici Berič. Gradjani ove Mjesne zajednice, s obzirom na to da ove radove izvodi vojska Federacije BiH, smatraju se ugroženim zato što je u vrijeme agresije upravo u ovoj Mjesnoj zajednici bilo nekoliko putnih komunikacija koje su bile od nevjerovatnog interesa za Kanton. Interesuje me, ako može uvaženi prof. Kurtović odgovoriti da li je ijedan od ovih putnih pravaca uvršten u ovaj projekat od Vlade?

Terović Dževad – Tokom prošle sedmice u posjeti Bosansko-podrinjskom kantonu Goražde boravila je delegacija Vlade Federacije na čelu sa premijerom. Informacije koje smo mi dobili putem medija o tematici koja je bila na dnevnom redu su jako šturo, a posjeta je došla u jednom vrlo važnom i značajnom trenutku, u trenutku kada Bosansko-podrinjski kanton Goražde preživljava nakon agresije možda svoje najteže dane, pa bih ja uvaženog premijera zamolio ako je moguće da nas usmeno, u skladu sa Poslovníkom, informiše o nekoliko osnovnih problema koje smo mi u ovoj Skupštini vrlo često isticali i tražili podršku i pomoć Federalne Vlade.

Mene zanima:

1/ Kakav je stav i mišljenje Federalne Vlade o Deklaraciji potrebe izgradnje brze ceste Sarajevo-Goražde, dokle se došlo i šta su na tom planu učinile institucije – Direkcija za ceste itd., po ovom pitanju i da li Vlada Federacije stoji zajedno sa nama iza ovog projekta?

2/ Mi smo na prošloj sjednici donijeli Odluku, pokrenuli inicijativu i podržali našeg poslanika u Zastupničkom domu Federalnog Parlamenta o potrebi izmjene Zakona o pripadnosti javnih prihoda, što je jedno od ključnih pitanja za funkcionisanje i rad, odnosno održivost ovog Kantona. Kakav je stav Federalne Vlade? Hoće li ona to podržati i hoće li biti na strani nas, jer bi tim riješili značajan dio problema?

3/ Danas ćemo najvjerovatnije donijeti Deklaraciju o potrebi ravnopravnosti Kantona u Federaciji Bosne i Hercegovine što je, takodjer, značajno jer se to često provlači da nismo u ravnopravnom položaju, da nemamo dovoljno resursa i da bez značajne pomoći viših nivoa vlasti objektivno ne možemo održati funkcionalnost Kantona.

4/ Da li se Vlada definitivno izjasnila o karakteru preuzetog kredita od 8,7 miliona KM Medjunarodnog monetarnog fonda. Ja koristim priliku da se Ministarstvu za finansije najiskrenije zahvalim što je vrlo korektno odgovorilo na moje postavljeno poslaničko pitanje na prethodnoj

sjednici i obavijestilo nas da je Vlada Federacije na sjednici od 25. 05. 2010. godine definitivno kazala da se radi o kreditnom zaduženju i ako ja premijera Mujezinovića vrlo često ne razumim, a nisam ga ni ovaj put razumio kakva je sudbina toga i mi nikada ne znamo šta on misli.

5/ Vidjeli smo iz pisanja „Dnevnog avaza“ od 26. 06. 2010. godine da je na nivou Federacije Bosne i Hercegovine na ime poticaja u raznim oblastima utrošeno 306 miliona KM, da je naš Kanton dobio svega 3,6 miliona KM, što je oko 1,5%. Ovo dovoljno govori da smo potpuno izgubili saradnju dvije vlade. Nemamo vertikale, nemamo podrške i zato možda bi mi i trebali ovom Deklaracijom tražiti odgovornost pojedinih izvršilaca u Vladi Federacije. Zašto se to desilo? Zašto se našem Kantonu nanose ovako teški propusti i nepravilnosti?

6/ Da li su sredstva planirana za opremanje Kantonalne bolnice kredit ili su to sredstva koja će preuzeti da vraća Vlada Federacije? Ovo govorim sa aspekta, ako i ovo bude kredit, a o ovome ćemo govoriti kod razmatranja Izvještaja o radu Vlade. Mi danas imamo kreditno zaduženje Kantona, kada realizujemo i ovaj, 20 miliona KM što itekako zabrinjava i opterećuje perspektivu i budućnost razvoja rada i održivosti Kantona u narednim fiskalnim periodima. Ovo neće biti problem samo 2011. godine.

7/ Vidjeli smo da je otpriliko obećano 2 miliona KM kao grant i da će se pomoći ovom Kantonu za izmirenje njegovih obaveza. Ja ne znam kako to misli premijer, jer se on nije izborio da u Budžetu za 2010. godinu planira i jednu marku za Bosansko-podrinjski kanton Goražde. Ima li osnova za to ili nema? Bilo bi dobro kada bi to realizovao i ako je 2 miliona KM u odnosu na naše sadašnje pozicije ispod svakog minimuma.

8/ Jedan od naših krupnih i vrlo ozbiljnih problema je zaobilaznica. Mi idemo u turističku sezonu a najteži kamioni i šleperi i dalje prolaze kroz centar grada i ugrožavaju bezbjednost putnika itd. Umjesto da imamo pomoć da zaobilaznica oko Goražda ide mi plaćamo kamate, penale, presudjuju nas i to su nevjerojatne neke stvari koje ja ne mogu da razumim.

9/ Imali smo obećanje da će Vlada pomoći ponovno otpočinjanje rada Mljekare „Milgor“ Goražde. Mi znamo da tu ima i naših problema. Ništa se ne dešava. Ima li šanse da Vlada pomogne da taj značajni privredni subjekt ne samo za Fabriku kao preradjivački kapacitet, već za naše građane i farmere konačno dodje u realizaciju i da i mi damo svoj doprinos na zaustavljanju i iseljavanju posebno iz ruralnih područja Kantona Goražde.

Molim g-dina Premijera da odmah, u skladu sa Poslovnikom, nakon ove diskusije da odredjena objašnjenja i obavijesti nas o ishodu razgovora.

Kurtović Mustafa – ministar za privredu u Vladi Bosansko-podrinjskog kantona Goražde

Dao je odgovor na poslaničko pitanje poslanika Adžem Memsura.

Uruči Nazif – premijer Bosansko-podrinjskog kantona Goražde

Dao je odgovor na poslaničko pitanje poslanika Terović Dževada.

Kumro Mesud – podnosim slijedeće:

I n i c i j a t i v e

1/ Da Kolegij Skupštine Bosansko-podrinjskog kantona Goražde i Vlada Bosansko-podrinjskog kantona za slijedeću sjednicu Skupštine pripreme nam Izvještaj o realizaciji godišnjeg Programa rada Skupštine i Vlade za šest mjeseci 2010. godine, što je u skladu sa članom 53. Poslovnika Skupštine Bosansko-podrinjskog kantona Goražde.

2/ Moja druga inicijativa odnosi se na rad građevinske inspekcije. Svaki put samo konstatujemo da su izraženi problemi, a problemi se i ne pokušavaju pokrenuti sa mrtve tačke. Jutros sam prolazio pored Bolnice gdje je izlivena mrtva ploča. Najmanje 70 cm je prešla na trotoar i vjerovatno ćemo danas imati objekat. Zaista, molim i zahtjevam od Vlade Bosansko-podrinjskog kantona Goražde da u okviru svojih obaveza u vodjenju zacrtane politike njenog rada u ovoj godini izvrši svoju obavezu i uradi nešto da se ovaj problem pokrene sa mrtve tačke.

Bašić Redžo – postavljam slijedeća:

Poslanička pitanja

1/ Koliki je u ovom trenutku stepen ostvarenih prihoda u odnosu na Budžet Bosansko-podrinjskog kantona Goražde za 2010. godinu, da li je Ministarstvo finansija zadovoljno tim procentom i koliki je procenat realizacije kapitalnih izdataka zaključno sa 31. 05. 2010. godine.

Odgovor na ovo pitanje tražim da mi se dostavi u skladu sa članom 208. Poslovnika ove Skupštine.

2/ Kada će biti uklonjeni ruševni i oštećeni objekti pored ulica u naseljima na području Bosansko-podrinjskog kantona Goražde i otklonjena opasnost po život pješaka i sigurnost prolaska motornih vozila pored takvih objekata /npr. objekat u ulici Meha Drljevića br. 6., koji vidimo iz skupštinske sale, i kada će se asfaltirati prekopane ulice i trotoari gdje je vršeno otklanjanje kvarova na podzemnim instalacijama /npr. prekopu kod O.Š. „Husein ef. Đozo“ u ulici Alije Hodžića itd./?

Odgovor na ovo pitanje tražim da mi se dostavi u skladu sa članom 208. Poslovnika ove Skupštine.

Pleh Muhidin – ministar za finansije u Vladi Bosansko-podrinjskog kantona Goražde

Dao je odgovor na prvo poslaničko pitanje poslanika Bašić Redža vezano za stepen ostvarenih prihoda u odnosu na Budžet Bosansko-podrinjskog kantona Goražde za 2010. godinu.

Uruči Nazif – premijer Bosansko-podrinjskog kantona Goražde

Dao je odgovor na drugo poslaničko pitanje poslanika Bašić Redža vezano za uklanjanje ruševina i oštećenih objekata u gradu Goraždu.

Tafro Hasan – /Na prijedlog poslanika Tafro Hasana odata je pošta poginulom policajcu Tariku Ljubuškiću/

Ovaj teroristički čin je otvorio bezbroj pitanja o uslovima rada policije i policijskih struktura u Federaciji Bosne i Hercegovine pa i Državi. U vezi toga i onog što smo odavno u nekim zaključcima govorili, ja u ime Komisije za bezbjednost, nadzor nad radom policije, borbu protiv korupcije i pitanja iz nadležnosti inspekcijских organa Skupštine Bosansko-podrinjskog kantona Goražde predlažem Skupštini Bosansko-podrinjskog kantona Goražde zaključak koji smo na sjednici Komisije za bezbjednost, nadzor nad radom policije, borbu protiv korupcije i pitanja iz nadležnosti inspekcijских organa Skupštine Bosansko-podrinjskog kantona Goražde, na sjednici održanoj 23. juna 2010. godine, jednoglasno predložili.

Zaključak glasi:

Predlaže se Skupštini Bosansko-podrinjskog kantona Goražde da donese zaključak i obaveže Vladu Bosansko-podrinjskog kantona Goražde i Ministarstvo unutrašnjih poslova Bosansko-

podrinjskog kantona Goražde da odmah obezbijede sredstva u Budžetu Ministarstva unutrašnjih poslova Bosansko-podrinjskog kantona Goražde za prijem 15 kadeta u činu policajca.

Vi na klupama imate ranije naše stavove, broj: 01-04-273/10, 01-04-271/10 od 8. aprila 2010. godine. Ovom prilikom, ja u ime Komisije, predlažem da Skupština usvoji ovaj Zaključak.

Agović Adis – Hvala ministru Kurtoviću na adekvatnom odgovoru na pitanje poslanika Adžem Memsura. Poznato je da sam ja na jednoj od sjednica kada smo usvajali Program rada Vlade i Program rada Skupštine dao Amandman da se pristupi sanaciji i rekonstrukciji putnog pravca Berič-Čitluk-Žišća-Omerov grob-Cerevnjak, kao i putni pravac Goražde-Hubjeri i ja se zahvaljujem Ministarstvu jer, izgleda, da su na pomolu ova oba putna pravca da se konačno jednom dovedu u red.

Želim istaći da je ovaj putni pravac o kome je ogovorio g-din Kurtović i g-din Adžem bio ratni put gdje su saobraćala vojna vozila kao i civili i to je bio i put spasa. Ja se nadam da će konačno doći do realizacije ove godine.

Na osnovu člana 202. i 203. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, postavljam poslaničko pitanje koje se odnosi na putni pravac Brzača-Orahovice koji je, isto tako, bio ratni put, ako može usmeni odgovor šta je s tim putnim pravcem i hoće li, eventualno, biti išta uradjeno na tom planu?

Kurtović Mustafa – ministar za privredu u Vladi Bosansko-podrinjskog kantona Goražde

Dao je odgovor na poslaničko pitanje g-dina Agović Adisa vezano za rekonstrukciju puta Brzača-Orahovice.

/Poslanik Agović Adis bio je zadovoljan odgovorom/

Ferhatović Jasmin – Na osnovu pritiska javnosti, uvaženih doktora, medicinskog osoblja i pacijenata, većine njih nezadovoljnih, a na osnovu člana 202. i 203. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, postavljam **s l i j e d e e:**

Poslaničko pitanje

Tražim od Ministarstva za socijalnu politiku, zdravstvo, raseljena lica i izbjeglice u Vladi Bosansko-podrinjskog kantona Goražde da do naredne sjednice Skupštine dostavi spiskove uposlenih, stručnu spremu i iznos plaća i dodatnih primanja u svim zdravstvenim javnim ustanovama na Bosansko-podrinjskom kantonu Goražde, kao i naknade predsjednicima i članovima upravnih odbora.

Obuća Bajro – Ja imam jednu ličnu inicijativu i jednu informaciju ispred Kluba poslanika Stranke demokratske akcije.

Prije nekoliko dana održana je vanredna sjednica Skupštine Fudbalskog kluba Goražde koji je bio sportski kolektiv Bosansko-podrinjskog kantona Goražde za 2009. godinu, jedini Fudbalski klub sa ovog prostora koji je član prve fudbalske lige Federacije BiH i Fudbalski klub koji ima jako puno problema koj su, prije svega, finansijske prirode iz kojih, naravno, proističu i mnogi drugi. Ja sam na toj Skupštini prisustvovao u svojstvu gosta i u tom Klubu nemam nikakve funkcije. Kao građanin, sportista i sportski radnik želim da pokušam pomoći Fudbalskom klubu Goražde i kao član Skupštine Bosansko-podrinjskog kantona Goražde da se ta situacija pokuša promijeniti.

Ja ću nadležnom Ministarstvu i Vladi Kantona dostaviti pisane informacije koje smo mi dobili, a radi se o izvještajima, zaključcima koje je ta Skupština donijela. Suština je da se još jedanput sagleda mogućnost i na nivou Kantona kroz izvršnu vlast, kroz resorno Ministarstvo i Vladu Kantona da se nekako pomogne da taj Klub zadrži status ako je ikako moguće prvoligaša, dakle, člana Prve fudbalske lige Federacije. Naravno, da je ovo meni jako nezahvalno iznositi znajući situaciju koja jeste u Budžetu Kantona, znajući da nema novca ni blizu dovoljno za održavanje sistema za puno i bitnije stvari, probelme i pitanja, ali moramo, ipak, voditi računa i o nevladinom sektoru, o udruženjima građana, posebno ako imamo u vidu taj aspekt kojim se bave, tu ljepotu sporta, odvlačenje mladih sa ulica i bavljenje jednom sportskom djelatnošću, a ne nečim što nije dobro itd., tu jednu prevenciju sigurno manje bolesnih, manje troškova za liječenja, znači, generalno u nekoj konačnici mi ćemo ulažući više u sport uštedjeti puno veća sredstva u nekim drugim oblastima. Oni traže 50.000 KM ne, naravno, samo od Bosansko-podrinjskog kantona da bi, jednostavno, mogli nastaviti takmičenje u rangu u kojem su se izborili i ostali u ovoj prethodnoj sezoni, a to je Prva liga Federacije.

Klub poslanika Stranke demokratske akcije, uzimajući u obzir sve probleme sa kojim se susreće Bosansko-podrinjski kanton Goražde, sačinio je draft jedne posebne Rezolucije o statusu Bosansko-podrinjskog kantona Goražde u Federaciji Bosne i Hercegovine. Ona je još internog karaktera i nećemo je danas uputiti u skupštinsku proceduru. Obavit ćemo još neke konsultacije, a dijelom i zbog toga što imamo i danas na dnevnom redu jednu Deklaraciju koja je, takodjer, izuzetno dobra i zavredjuje da je danas usvojimo, eventualno, da je dopunimo.

Milović Daliborka – Na osnovu člana 202. i 203. Poslovnika Skupštine Bosansko-podrinjskog kantona Goraže, podnosim **s l i j e d e ć u**:

Inicijativu

Ministarstvu za privredu Bosansko-podrinjskog kantona Goražde za unapredjenje sigurnosti i bezbjednosti odvijanja saobraćaja u ulicama Meha Drljevića i dijelu puta gdje se razdvajaju ulice Murisa Živojevića i Žepska. U ovom dijelu je odvijanje saobraćaja veoma ugroženo kako za učesnike u saobraćaju tako i za same pješake, pa predlažem Ministarstvu postavljanje ogleдалa na dva najugroženija mjesta.

Obrazloženje

Odvijanje saobraćaja i sama bezbjednost u ovim ulicama je u velikoj mjeri ugrožena i radi se o vrlo nepreglednim ulicama za nesmetano odvijanje saobraćaja, pa je stoga neophodno postavljanje ogleдалa ili da se uredi odvijanje saobraćaja u jednom smjeru.

Kurtović Mustafa – ministar za privredu u Vladi Bosansko-podrinjskog kantona Goražde

Dao je odgovor na postavljeno pitanje poslanice Milović Daliborke i istakao da je Magistralni put M-20 u isključivoj nadležnosti J.P. Direkcije cesta Federacije Bosne i Hercegovine, a što se tiče signalizacije nadležni su „Goražde-putevi“ Goražde. Što se tiče ostalog, a u nadležnosti je Direkcija cesta našeg Kantona mi ćemo u saradnji sa Ministarstvom unutrašnjih poslova Bosansko-podrinjskog kantona Goražde poduzeti sve mjere.

/Poslanica Milović Daliborka bila je zadovoljna odgovorom na poslaničko pitanje/

Mujković Dževida – Postavljam slijedeću:

Poslaničku inicijativu

U cilju napretka i poboljšanja kvaliteta obrazovanja u našem Kantonu, predlažem da se svim učenicima koji upisuju srednju školu obezbijedi upis u školu koju žele pohađati.

Obrazloženje

Pored želje da donesmo Zakon o srednjem obrazovanju nismo uspjeli ga donijeti, pa na neki način mogu priznati da dijelom krivicu snosi i Socijaldemokratska partija, odnosno Klub poslanika. Želja nam je bila da unaprijedimo i da postavimo temelje za bolje i kvalitetnije obrazovanje, za napredak u obrazovanju, za obezbjednje onoga što treba našoj djeci u budućnosti. To je jedan od razloga. Drugi od razloga jeste da smatramo da će djeca koja uče i idu u školu koju vole imati sigurno bolje rezultate i da ćemo imati mnogo više kvaliteta. O tome se psihološki i pedagoški može puno više pričati, ali mislim da je to jedan od razloga. Treći od razloga jeste ono što se ne govori, a jeste istina, da u prvom prijemnom roku u principu polože oni koji zadovolje po kriterijima, a u drugom prijemnom roku primi se dijete ovog ili onog. Znači, na neki način dodjemo u situaciju da svi budu primljeni tamo gdje žele. Da bi smo izbjegli takve situacije i na neki način pomogli u rješavanju ovih problema, predlažem ovu inicijativu.

Imam i jedno pitanje da nam ministrica odgovori u kojoj je fazi popunjavanje radnih mjesta u Pedagoškom zavodu?

Delizaimović Alma – ministrica za obrazovanje, nauku, kulturu i sport u Vladi Bosansko-podrinjskog kantona Goražde

Dala je odgovor na pitanje poslanice Mujković Dževide vezano za popunu radnih mjesta u Pedagoškom zavodu.

Žuga Damir – Samo da se osvrnem na ranije postavljena poslanička pitanja. G-din Frašto je postavio pitanje vezano za GIRO „Drina“ Goražde. I sam sam postavljao to pitanje i još uvijek čekam odgovor od Kantonalnog pravobranilaštva o toj državnoj imovini za koju se tvrdi da je prodana. To je državna imovina i neko sebi daje za pravo da je proda za pola miliona KM i taj novac je otišao negdje. Tražim odgovor na ovo pitanje.

Pridružujem se inicijativi g-dina Obuće u vezi interventne pomoći Fudbalskom klubu Goražde.

Predlažem kada na narednoj sjednici budemo raspravljali po našem zaključku vezano za odgovore Tužilaštva na neka iznijeta pitanja na ovoj i prethodnim sjednicama Skupštine, ta sjednica bude zatvorena za javnost.

Predlažem Vladi Kantona Goražde da dozvoli Komisiji za mlade Skupštine Bosansko-podrinjskog kantona Goražde, s obzirom da je istekao skupštinski Zaključak, objavljen u „Službenim novinama Bosansko-podrinjskog kantona Goražde“ gdje se zadužila Vlada da uradi Akcioni plan za mlade nakon analize koju smo imali vezano za položaj mladih s akcentom na Bosansko-podrinjski kanton Goražde, mislim da to Vlada ne može sama uraditi i da joj treba pomoć. Mi smo i onda u raspravi kada smo donosili taj Zaključak ponodili se i sada nudim da Komisija za mlade uradi draft dokument i da pošalje Vladi taj Akcioni plan i da se Vlada o njemu očituje. To su dobronamjene stvari i mislim da Vlada ne bi trebala imati ništa protiv toga.

Obzirom da je imenovanjem ove Vlade, od 01. 12. 2008. godine Centar za socijalni rad ostao bez direktora i da do dana današnjeg, dakle već 19 mjeseci te poslove obavlja V.D. direktor lice iz reda uposlenika, postavljam:

Poslaničko pitanje

Šta je Vlada i resorno Ministarstvo uradilo po preuzetoj obavezi, datoj na sjednici ove Skupštine, a nakon više puta postavljenog poslaničkog pitanja u vezi neimenovanja direktora Centra.

Dokle mislite potećenjivati poslanike i gradjanstvo /cijeneći da su neuki/ i kršiti zakonske propise, držeći mjesto direktora u „pričuvi“, za svoje kandidate i otežući ovo imenovanje vjerovatno do post izbora?

Kao da se radi o ispunjavanju uslova za voženje vasijskog broda, a ne obične Javne ustanove pa, eto, ko nema ljudi /kandidata/ koji ispunjavaju uslove! Providno i žalosno!

Tražim usmeni, a ako ne budem zadovoljan i pismeni odgovor na ovo pitanje.

Pokrećem i slijedeću:

Poslaničku inicijativu

Da Vlada Kantona, odnosno Ministarstvo privrede, za narednu sjednicu Skupštine pripremi detaljan Izvještaj o radu Kantonalne turističke zajednice.

Smatram da rad Turističke zajednice, i sam turizam u našem Kantonu nije na zavidnom nivou i želim da se ova Skupština detaljno upozna sa svim problemima sa kojima se susreće Turistička zajednica našeg Kantona, sa planom i Programom rada u narednom periodu.

Da vidimo koliko Općina, Kanton i Država ulažu u turizam, ovdje se često zaklinjemo u turizam. Šta prvi ljudi Turističke zajednice misle i kakav je njihov stav o izgradnji HE Ustikolina i sve drugo što je bitno za turizam, a sve s ciljem olakšanja rada Turističkoj zajednici i poboljšanja istog?

Imamović Demir – ministar za socijalnu politiku, zdravstvo, raseljena lica i izbjeglice u Vladi Bosansko-podrinjskog kantona Goražde

Dao je odgovor na poslaničko pitanje poslanika Žuga Damira vezano za imenovanje direktora J.U. Centar za socijalni rad Goražde.

Imamović Ibrahim – Mi stalno govorimo o kreditnom zaduženju od 8 miliona KM. U principu, Država je jedna velika kuća, a i Federacija je jedna kuća. Ta Federacija se zadužila od MMF-a. Ko će vraćati pare? Vratit će građani Bosansko-podrinjskog kantona Goražde, građani Federacije i građani Bosne i Hercegovine na kraju krajeva. Da li se nešto zove ovako ili onako? Naš Bosansko-podrinjski kanton u tom smislu stavlja se u jedan drugi položaj, što je i predmet Deklaracije koju smo predložili. Jednostavno šta će biti? Imat ćemo manje para za razvoj ako to bude kredit. Zato pokrećem ***slijedeće***:

Poslaničke inicijative

1/ Da nadležna tijela, da li je to Tužilaštvo, Ministrastvo ili Vlada Kantona pokrenu kod Ustavnog suda Federacije inicijativu za ocjenu ustavnosti Odluku Vlade o kreditnom zaduženju.

U principu svejedno je. Ovaj Kanton će morati neko da finansira samo što će nam reći da daju manje para ili ćemo ih dobiti pa ih vratiti.

2/ Devastirani objekti u gradu, zaista, ugrožavaju život i zdravlje ljudi. Svi objekti koji ugrožavaju život i zdravlje ljudi postoji jedna vrlo jednostavna procedura i to se u roku od 24 sati može da riješi. To je nadležnost inspekcije. Gradjevinski inspektor donosi rješenje da se taj objekat ukloni i on se uklanja. Poslije toga vlasničke i sve druge stvari se rješavaju, jer niko ne smije dozvoliti da se ugrožava život i zdravlje ljudi.

3/ Imam inicijativu za Ministarstvo za privredu ili Ministarstvo za urbanizam, prostorno uređenje i zaštitu okoline da li možemo obezbijediti određena sredstva da Država otkupi devastirane objekte?

4/ Festival prijateljstva je brend Goražda, brend ovog Kantona i mi moramo svoje brendove njegovati i podržavati. Da bi se vratili izbornim idejama, odnosno onome šta je taj festival predstavljao, postoje određene stvari ni Opština nije u stanju da to finansira, a postoje i određene stvari nerazumijevanja pa su se zaboravile izvorne ideje itd. Predlažem da se iz Budžeta Ministarstva za obrazovanje, nauku, kulturu i sport Bosansko-podrinjskog kantona Goražde izdvoji 50.000 KM – podrška programima izvorne ideje festivala prijateljstva. To je ono što djeca crtaju, radionice, našim prijateljima koji će doći treba samo obezbijediti smještaj itd.

Halilović Adis – Imam jedno poslaničko pitanje

Poznato nam je da je turizam kao privredna grana tretirana i Ustavom Kantona, a da rijeka Drina raspolaže velikim potencijalom za razvoj izletničkog turizma i ribarenja, kajakaštva, splavarenja i sl. Jedan od velikih problema rijeke Drine kao turističke destinacije jeste temperatura vode tokom ljetne turističke sezone. Niska temperatura vode rijeke Drine jeste Hidro elektrana na Mratinju. S obzirom da nam navedena Hidro elektrana nanosi veliku štetu razvoja turizma, postavljam pitanje resornom Ministarstvu privrede da li postoji mogućnost traženja odštete od navedene Hidro elektrane jer građani naših opština Ustikoline i Goražda ispaštaju ili, eventualno, da li postoji mogućnost da se u periodu ljetne turističke sezone napravi dogovor oko nepuštanja brane? Mislim da smo svi svjesni činjenice u ljetnom periodu kakvo je stanje, kakva je voda i koliko se puta u toku sezone možemo kupati, normalno, da nije prehladna voda.

Bilić Dragomir – Kolega Frašto je odsutan pa me zamolio da zatražim, pošto je turistička sezona, da nadležno Ministarstvo dostavi spisak kontrolisanih i kažnjenih lica učesnika u saobraćaju u mjesecu junu 2010. godine.

Podrug Salko – U potpunosti podržavam kolege koji su insistirali na pomoći Fudbalskom klubu Goražde za učestvovanje Kluba u prvoj ligi Federacije Bosne i Hercegovine.

Predlažem da kao gest pomoći onim koji su nam dali mandate pomognemo našoj omladini, tako da ova Skupština donese zaključak kojim se poslanici odriču dijela svog paušala u iznosu od po 500,00 KM. Insistiram da se o ovom izjasnimo odmah!

Begović Alija – predsjedavajući Skupštine

Pošto se niko više ne javlja za riječ, zaključujem ovu tačku dnevnog reda i pozivam sve poslanike koji su uputili pitanja i inicijative, a nisu ih dostavili u pisanoj formi da to u skladu sa Poslovníkom Skupštine Bosansko-podrinjskog kantona Goražde učine. Također, pozivam sve one kojima su postavljena poslanička pitanja i inicijative da u rokovima predviđenim Poslovníkom Skupštine Bosansko-podrinjskog kantona Goražde dostave odgovore

Tačka 2.-

Prelazimo na 2-gu tačku dnevnog reda: Prijedlog Zakona o unutrašnjim poslovima Bosansko-podrinjskog kantona Goražde.

Obrazloženje po Prijedlogu Zakona o unutrašnjim poslovima Bosansko-podrinjskog kantona Goražde dao je ministar unutrašnjih poslova Bosansko-podrinjskog kantona Goražde Sipović Nusret.

Begović Alija – predsjedavajući Skupštine

Otvaram raspravu o Prijedlogu Zakona o unutrašnjim poslovima Bosansko-podrinjskog kantona Goražde.

Obuća Bajro – Ja moram ovdje da istaknem, što je meni bitno i Klubu poslanika Strane demokratske akcije, pozitivno mišljenje i stavove OHR-a i EUPM-a što je vrlo bitno u ovom

segmentu, u ovoj oblasti. Ovo je nedvosmislena podrška ovom projektu koji je unificiran u kantonima u Federaciji Bosne i Hercegovine i što je vrlo pohvalno da idemo ka nekim novim rješenjima, ka nekim novim standardima i u ovoj oblasti i naravno da sve to ima podršku Medjunarodne zajednice, odnosno njenih organa na ovom prostoru. Klub poslanika Stranke demokratske akcije podržavao ovaj Zakon u Nacrtu, podržavamo ga i u Prijedlogu. Kako je predložen u osnovnom tekstu on je za Klub poslanika Stranke demokratske akcije potpuno prihvatljiv. Ne znam kako će se očitovati Vlada Bosansko-podrinjskog kantona Goražde vezano za predložene amandmane koji su uputni od skupštinske Komisije. Sa aspekta našeg Kluba mislim da su i oni prihvatljivi. Ostalo je samo nedorečeno vezano za ovaj jedan Amandman oko tehničkog sekretara. Nama ni to nije problem obzirom da u suštini to nije novo radno mjesto. To je jedna podrška samo za rad Nezavisnog odbora, a taj jedan standard smo imali u prethodnom, odnosno još uvijek važećem Zakonu. Volio bih da i u ovom dijelu dobijemo mišljenje, odnosno stav predstavnika Medjunarodnih organizacija. Da ovo radimo u punoj mjeri usaglašeno po svim pitanjima. Ovo je stav Kluba poslanika Stranke demokratske akcije. O nekim detaljima bi se mogla voditi rasprava, ali toj raspravi je više vremena trebalo posvetiti tokom Nacrta i javnih rasprava, tako da u suštini one, po našem mišljenju, ne zavređuju neku punu pažnju, da o tim nekim sitnim tehničkim detaljima danas otvaramo neku veliku raspravu.

Obzirom da sam predsjednik Komisije za izbor i imenovanja, imam jednu dilemu. Kada se u Zakonu govori o svim procedurama za izbor Nezavisnog odbora, to je poglavlje V, članovi 24. do 33. Na jednom mjestu se kaže „imenovanje“, a na drugom „izbor“, pa se ponovo u nekom narednom članu kaže „imenuje“, a u slijedećem „bira“. Šta je suština? Imenovanje je jedan formalni čin koji neko donosi i koji rezultira donošenjem neke odluke, rješenja ili nekog drugog akta, a izbor je jedna procedura koja zahtjeva puno više vremena i koja se radi, naravno, u skladu sa postojećim propisima. Jedan od njih koji se pominje i u ovom Zakonu, a i da se ne pominje na snazi je Zakon o vladinim, ministarskim i drugim imenovanjima u Federaciji Bosne i Hercegovine koji tačno precizira određene standarde, kriterije, procedure itd. po kojima treba raditi.

Dakle, sa tog jednog aspekta da ni bi, eventualno, imali određene dileme ili neka pitanja u implementaciji ovog Zakona za koji se nadam da će danas dobiti podršku i biti usvojen i zaslužuje da bude usvojen da možda ova određena pitanja odmah razriješimo kako se ta pitanja ne bi, eventualno, otvarala kasnije i kako ne bi bili problemi u implementaciji ovog Zakona.

Klub poslanika Stranke demokratske akcije nema nekih novih amandmana na ovaj Zakon. Dajemo podršku njegovom donošenju i njegovom usvajanju. Nadam se da će danas ovaj Zakon biti usvojen kako bi se procedurama moglo stići na vrijeme obzirom da postojećem Nezavisnom odboru ističe mandat 17. jula 2010. godine. Istina, usvajanjem ovog Zakona mi ustanovljavamo mehanizam i nemamo tu praznog hoda. I to je pokriveno i imat ćemo i u tom periodu sve do izbora novog, ovaj stari Nezavisni odbor koji će obavljati dužnost. Sve pohvale svima onima koji su učestvovali u jednom ovom procesu koji dugo traje i koji je, čini mi se, rezultirao usvajanjem ovog Zakona u Tuzlanskom kantonu da i mi idemo tom stazom uz jednu veliku zahvalnost svima onim, predstavnicima domaćih institucija onih koje su ovlaštene da predlažu, kreiraju i usvajaju ove procese, kao i predstavnicima Medjunarodnih organizacija koji ovdje, svakako, daju jednu vrlo značajnu podršku.

Terović Dževad – Generalno, kada na Skupštinu dodje Prijedlog Zakona, podrazumijeva se da je prošao javnu raspravu i u principu ne bi trebalo otvarati neke velike rasprave. Ja ću iskoristiti poslovnička prava i prava ovlaštenih predlagača, kako se kaže, za eventualno intervenisanje amandmanima.

Na osnovu člana 140. i 141. stav 1. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, na Prijedlog Zakona o unutrašnjim poslovima Bosansko-podrinjskog kantona Goražde, podnosim *s l i j e-
d e ć i:*

A m a n d m a n

Članom 40. pomenutog Prijedloga Zakona predloženo je:

1/ „Najkasnije u roku od 8 dana od dana prijema rezultata odabira od Nezavisnog odbora iz člana 39. ovog Zakona, ministar upućuje obrazložen prijedlog sa imenom jednog od predloženih kandidata Vladi Kantona na imenovanje“.

2/ „Ukoliko ministar ne uputi prijedlog kandidata u roku iz stava 1. ovo člana Nezavisni odbor dostavlja prijedlog sa imenima dva kandidata direktno Vladi koja će imenovati jednog od kandidata za policijskog komesara“.

Predlažem da član 40. glasi:

1/ Najkasnije u roku od 8 dana od prijema rezultata odabira od Nezavisnog odbora, ministar upućuje prijedlog jednog kandidata Vladi na imenovanje“.

2/ „Ukoliko prijedlog nije podnešen u roku predviđenom u stavu 1. ovog člana Nezavisni odbor će dostaviti prijedlog direktno Vladi, koja će imenovati kandidata za policijskog komesara“.

O b r a z l o ž e n j e

Ukoliko bi član 40. ostao kako je i predloženo prijedlogom ovog Zakona umanjila bi se uloga i značaj Nezavisnog odbora za izbor i imenovanje komesara, odnosno njegov zadatak sveo bi se na izradu rang liste, znači ne bi odlučivao o izboru, a omogućio bi politički uticaj ministru koji je ipak direktno predložen od političkih partija da utiče na izbor komesara u skladu sa stavovima političke partije koja ga je predložila na mjesto ministra. Ovim bi se, također, ostavila mogućnost da u toku praćenja trajanja mandata i rada komesara od strane ministra koji je napomenuli smo biran na prijedlog političkih partija da vrši uticaj i miješa se u rad komesara, odnosno njegovo profesionalno samostalno izvršavanje obaveza propisanih pozitivnim zakonskim propisima.

Žuga Damir – Mi smo jučer na Klubu razmatrali Prijedlog Zakona o unutrašnjim poslovima Bosansko-podrinjskog kantona Goražde i u prvoj varijanti imali smo nešto više predloženih amandmana, a onda moram da se zahvalim predstavnicima OHR-a koji su na naš poziv došli na naš Klub i sve naše sumnje otklonili vezane za naše amandmane. Na kraju od tih svih amandmana mi smo odustali i ostali smo kod naša dva amandmana koje ću ja poslije pročitati, ali prije toga želim nešto da kažem.

Begović Alija – predsjedavajući Skupštine

G-dine Žuga da li ste dostavili amandmane u roku predviđenim Poslovníkom Skupštine Bosansko-podrinjskog kantona Goražde u Stručnu službu Skupštine?

Žuga Damir – Ja bih vas zamolio g-dine predsjedavajući da ne idemo u tu proceduru, to je za mene dodvoravanje predstavnicima OHR-a i EUPM-a, uvijek smo predlagali amandmane i tražim da se Skupština opredijeli da li treba da predložimo amandmane ili ne treba.

Begović Alija – predsjedavajući Skupštine

Skupština će se opredjeliti o tome, ali sam ja kao predsjedavajući Skupštine dužan da upozorim. Nije riječ ni o kakvom dodvoravanju nego o poštivanju procedura.

Žuga Damir – Mišljenje Kluba poslanika Stranke za Bosnu i Hercegovinu je da je ovaj Prijedlog Zakona dobro odradjen u jako kratkom vremenu, što je poruka i drugim da se može u jako kratkom vremenu provesti nacrt i prijedlog i doći do jednog kvalitetnog Zakona. Mi smo imali sumnje, jer je jedino Skupština tuzlanskog kantona usvojila ovaj Zakon, a imali smo i neku bojaznost u prvi mah, jer znamo da odmah ide procedura izbora Nezavisnog odbora za izbor i reviziju policijskog komesara, kao i sam izbor komesara, pa smo se bojali da neko ne pokušava u tom smjeru da neke stvari dovede u red kako bi mogao što lakše da prodje. Moram da pohvalim predstavnike OHR-a koji su dva sata proveli na sjednici našeg Kluba i da im se zahvalim na odgovorenim svim pitanjima koje su postavljali svi poslanici našeg Kluba.

Dakle, da ponovim, U skladu sa članovima 140. 141. i 142. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, u ime Kluba Stranke za Bosnu i Hercegovinu podnosim na Prijedlog Zakona o unutrašnjim poslovima Bosansko-podrinjskog kantona Goražde, **sljedeće:**

A m a n d m a n e

1/ Da se član 25. stav c/ izmijeni i da glasi: „Jedan bivši policijski službenih sa najmanje 10 godina iskustva na rukovodnom radnom mjestu“.

O b r a z l o ž e n j e

Ovaj Amadman je potpuno isti kao što je to EUPM predložio. Ako ostane ovako kako to piše u Prijedlogu Zakona onda možemo staviti ime i prezime tog čovjeka s obzirom da imamo jednog ili dvojicu na području Bosansko-podrinjskog kantona Goražde.

2/ Da se iza stava 3. u članu 68. iza riječi: „Ministarstva“ umjesto tačke stavi zarez i dodaju riječi: „a saglasnost na isti daje Vlada Bosansko-podrinjskog kantona Goražde“.

O b r a z l o ž e n j e

Zašto ovaj Amandman? Želio bih da spriječim neko dodvoravanje. Znamo da je ministar politička ličnost i zato bi trebala Vlada da da saglasnost na te pravilnike.

To su naša dva amandmana, ja ih podnosim i volio bih da se Vlada Bosansko-podrinjskog kantona Goražde izjasni o ovim amandmanima, a potom i Skupština.

Begović Alija – predsjedavajući Skupštine

Zahvaljujem. I prije nego što dam riječ slijedećem diskusantu, samo kao predsjedavajući, da se ne bi pogrešno tumačili i komentirali na različite načine, naš član 141. Poslovnika odnosi se na amandmane. Stav 3. ja ću ga pročitati svima, jer mi smo ga i donijeli i u principu bi smo ga morali poštovati. Ako se Skupština slaže da izbrišemo taj stav ja ću to vrlo rado prihvatiti što se mene tiče.

Član glasi ovako:

„Amandman se podnosi predsjedavajućem Skupštine u roku koji ne može biti kraći od 3 dana od dana određenog za održavanje sjednice na kojoj će se pretresati prijedlog zakona. Izuzetno, uz prethodnu saglasnost Skupštine iz opravdanih razloga koji moraju biti obrazloženi Amandman se može podnijeti na samoj sjednici Skupštine.“

Ovaj stav nije slučajno usvojen on zaista, ima smisla. Da bi se Vlada opredjelila prije same sjednice da može se upoznati sa amandmanima i očitovati, da bi se radna tijela također upoznala i očitovala, Ustavnoj i zakono-davno pravnoj komisiji je interesantno da li su neki amandmani usklađeni, a i vi kao poslanici i sjećam se g-din Žuga je tražio da se Ustavna i zakonodavno-pravna

komisija nekad očituje o nekim amandmanima koji se ulažu, da li su u skladu sa pravnim sistemom Bosansko-podrinjskog kantona Goražde itd. Ja sam kao predsjedavajući Skupštine Bosansko-podrinjskog kantona Goražde dužan da pošujem Poslovnik i da Vas upoznam s tim, meni niko osim Komisije za bezbjednost, nadzor nad radom policije, borbu protiv korupcije i pitanja iz nadležnosti inspeksijskih oorgana nije dostavio u predviđenom roku amandmane, ali ako se Skupština u skladu sa drugim dijelom ovog stava slaže, ja ću to sad ponuditi da li se slažete da možemo podnositi amandmane i u toku ove sjednice, ako da, nastavićemo pa nek poslanici predlažu amandmane. Ja ću zaista, kandidirati da se ovaj stav briše, jer se u principu nepoštuje.

Mehmed Turčalo – Ja ću uložiti jednu malu ispravku na ovo o čemu mi danas govorimo, ovo ide od prilike do prilike kada se može u toku sjednice podnijeti Amandman, a kad se ne može. Nije odavno bilo da smo se na ovo pozvali. Mi smo sinoć na Klubu imali jedan vrlo korektan dogovor sa gospodom iz OHR-a, i mislim da nije ništa sporno sama riječ da se danas za ovom govornicom pomenula riječ „unificirani tekst“ ovog Zakona u nekoliko navrata, jasno Vam govori da mi ovdje nemamo ni prostora ni prava da bi nešto drastično mogli mjenjati. Ove amandmane koje je podnijela i na vrijeme, nije prije 3 dana nego prije 5 dana Komisija za bezbjednost, nadzor nad radom policije, borbu protiv korupcije i pitanja iz nadležnosti inspeksijskih organa, dobro bi bilo da je Vlada tada presjekla na tome i kazala: mi smo ovo uradili da bi onemogućili poslanicima da danas ovdje mi podnosimo amandmane. Međutim, Vlada se nije očitovala i ne mogu da vjerujem da niste imali vremena za ovih 5 dana za 5 amandmana da se očitujete. Ujedno da kažem da naš Klub podržava sve ove amandmane, ukoliko ih Vlada prihvati, jer su svi tehničke prirode. Amandman broj 2. govori se o osobi koja bi opsluživala Nezavisni odbor, u principu ovo podržavamo i ako je to tako, onda bi nam bilo ovo uvjerljivije da je se Vlada očitovala o ovim amandmanima, a onda bi se mi dalje pitali da stvarno moramo ovo poštovati. Nas ovo malo buni, jednom može, a drugi put ne može.

Dževad Terović - Poslovnička intervencija

U članu 136. Poslovnika Skupštine Bosansko-podrinjskog kantona Goražde predviđeno je:

1/ Predsjedavajući Skupštine po prijemu dostavlja prijedlog Zakona poslanicima i on se može pretresati na sjednici Skupštine po isteku roka od 7 dana od dana dostavljanja poslanicima.

37- ma redovna sjednica Skupštine Bosansko-podrinjskog kantona Goražde u prvoj verziji zakazana je 15. juna 2010.godine, pa je onda 24. juna 2010. godine došla obavijest da se ta sjednica održava 30. juna 2010. godine. Pa smo dobili novi prijedlog dopune dnevnog reda za uvrštavanje pomenutog Prijedloga Zakona o unutrašnjim poslovima Bosansko-podrinjskog kantona Goražde na današnju sjednicu. G-dine predsjedavajući, poslanici, u skladu sa Poslovnikom nije ispoštovana procedura u dostavljanju materijala, a postoji potreba za donošenjem Zakona, ja to uopšte ne osporavam, da li će neko prihvatiti nečije amandmane ili neće to je druga priča, ali postoji potreba, ali ako ćemo detaljno u proceduru, onda je to drugačije.

Begović Alija – predsjedavajući Skupštine

Ja ne znam tačno kad je dostavljen Prijedlog Zakona o unutrašnjim poslovima Bosansko-podrinjskog kantona Goražde, ako je kraći nego što je predviđeno Poslovnikom može se uvažiti razlog da se i na današnjoj sjednici mogu podnositi amandmani.

Jasmin Ferhatović – poslovnička intervencija

Ja pozivam poslanike da uvažimo ovo što smo nekad kršili, vidite kako se to nekom obije o glavu, a nekom se ne obije, nekad smo kao poštovali, a nekad nismo. Ja Vas danas molim da sad prekinemo sjednicu da bi se Vlada mogla očitovati o ovim amandmanima.

Begović Alija – predsjedavajući Skupštine

Ja ću staviti na izjašnjavanje da li Skupština Bosansko-podrinjskog kantona Goražde u skladu sa stavom 3. člana 141. daje saglasnost da se amandmani mogu podnijeti i u toku rasprave.

Ko je za, molim, da digne ruku? /24 poslanika/

Ima li neko protiv? /Niko/

Da li se neko uzdržao? /Niko/

Konstatiram da je Skupština Bosansko-podrinjskog kantona Goražde, jednoglasno, sa 24 glasa „za“ dala saglasnost da se amandmani mogu podnositi u toku rasprave.

Hasan Tafro - Komisija za bezbednost, nadzor nad radom policije, borbu protiv korupcije i pitanja iz nadležnosti inspekcijskih organa Skupštine Bosansko-podrinjskog kantona Goražde, na sjednici održanoj 23. juna 2010. godine razmatrala je Prijedlog Zakona o unutrašnjim poslovima Bosansko-podrinjskog kantona Goražde, pa je na osnovu člana 46. i 140. Poslovnika Skupštine Bosansko-podrinjskog kantona Goražde /“Službene novine Bosansko-podrinjskog kantona Goražde“, broj: 10/08/, predlaže ***sljedeće***:

A m a n d m a n e

1/ U članu 29. stav 2. iza riječi: “utvrđuje” briše se riječ: “Skupština”, a dodaju riječi: “Komisija za budžet, finansije i administrativna pitanja Skupštine Bosansko-podrinjskog kantona Goražde”.

2/ U članu 32. stav 3. iza riječi: “obavlja” dodaju se riječi: “tehnički sekretar Nezavisnog odbora koga imenuje Nezavisni odbor na prijedlog sekretara Skupštine Bosansko-podrinjskog kantona Goražde. Naknadu sekretaru Nezavisnog odbora utvrđuje Komisija za budžet, finansije i administrativna pitanja Skupštine Bosansko-podrinjskog kantona Goražde”. Ostali tekst u stavu 3. se briše.

3/ Član 55. stav 2. mijenja se i glasi: “Članove Odbora imenuje Skupština Bosansko-podrinjskog kantona Goražde na prijedlog Komisije za izbor i imenovanja Skupštine Bosansko-podrinjskog kantona Goražde.

4/ U članu 58. stav 3. iza riječi: “visinu”, brišu se riječi: “utvrđuje Skupština Kantona”, a upisuju riječi: “Komisija za budžet, finansije i administrativna pitanja Skupštine Bosansko-podrinjskog kantona Goražde”.

5/ Član 61. stav 1. mijenja se i glasi: “Skupština Bosansko-podrinjskog kantona Goražde, na prijedlog Komisije za izbor i imenovanja smjenjuje člana Odbora ako taj član više ne ispunjava bilo koji od uvjeta predviđenih za imenovanje.

O b r a z l o ž e n j e

Amandman 1. i 4. – Komisija za budžet, finansije i administrativna pitanja Skupštine Bosansko-podrinjskog kantona Goražde utvrđuje sve naknade za izabrane zvaničnike i članove radnih tijela, pa se predlaže da naknadu za Nezavisni odbor određuje ova Komisija.

Amandman 2. - Zakonom o izmjenama i dopunama Zakona o unutrašnjim poslovima Bosansko-podrinjskog kantona Goražde /“Službene novine Bosansko-podrinjskog kantona Goražde” broj: 10/02/ u članu 5. predviđen je sekretar Nezavisnog odbora kojeg je na prijedlog sekretara Skupštine imenovao Nezavisni odbor.

Sjednice Nezavisnog odbora za izbor i reviziju policijskog komestara MUP-a BPK-a Goražde drže se poslije radnog vremena, a i zbog nepopunjenosti Stručne službe Skupštine Bosansko-podrinjskog kantona Goražde, koja zapošljava sekretara Skupštine Bosansko-podrinjskog kantona Goražde i dva namještenika, neophodno je imenovati tehničkog sekretara koji će obavljati poslove za Nezavisni odbor.

Amandman 3. i 5. - Prema odredbama Poslovnika Skupštine Bosansko-podrinjskog kantona Goražde Komisija za izbor i imenovanja Skupštine Bosansko-podrinjskog kantona Goražde ne može imenovati niti smjenjivati članove Odbora. Konačna imenovanja vrši Skupština Bosansko-podrinjskog kantona Goražde na prijedlog Komisije za izbor i imenovanja.

Begović Alija – predsjedavajući Skupštine

Zahvaljujem g-dinu Tafriu. Da li još neko želi da predlaže amandmane?

Ibrahim Imamović - U ime Kluba Socijal-demokratske partije ja sam na prošloj sjednici nešto govorio pa da ne ostanemo nejasni. Ja sam rekao da je reforma policije jedna od najuspješnijih reformi. Ali da se razumijemo, postoji tranzicija, postoji reforma. Međunarodna zajednica u tranziciji naše policije 1996. godine od kad je ovdje prisutna dala je nemjerljiv doprinos od ponašanja policajaca i sve druge stvari, ljudi su uljudili, ja se sjećam dobro 1996. godine bili su kauboiji i šerif itd. To je jedna stvar, tehnička pomoć koju pruža Međunarodna zajednica u izradi svih naših akata je dragocjena, jer mi nemamo nikakvo prethodno iskustvo da bi napravili ovako nešto. Što su naši političari upropastili reformu policije koja je govorena to je jedna druga stvar, to je krivica na nama, da se razumijemo. Svaki zakon se može i doraditi i napraviti bolje i lošije. Mi moguće da smo imali nekih primjedbi, ali kad smo pogledali cjelinu SDP će podržati ovaj Zakon, moguće da ima nekakvih stvarčica i ne sviđa mi se jedna stvar čim se donosi neki novi propis otvaraju se, otkrjavaju se neka vrata da mi širimo nekakvu administraciju, novo upošljavanje itd., što je izražavalo nama sumnje. Da kažem u ime Kluba SDP-a ne vodi se borba protiv terorizma primanjem novih policajaca, ovo je vrlo ozbiljna stvar malo prije što je bila inicijativa u početku da mi primimo 15 policajaca i riješićemo čitave probleme. Daleko su dublji i primjena ovog Zakona, mislim, u budućnosti da su moguća neka rješenja izložena popravci. Mi ćemo podržati ovaj Zakon bez obzira na amandmane, odnosno bez amandmana u onome tekstu u kome je predložen.

Begović Alija – predsjedavajući Skupštine

Da li još neko traži riječ, ako ne pozivam Vladu Bosansko-podrinjskog kantona Goražde da se očituje o predloženim amandmanima, a mi nastavljamo sa radom.

Tačka 3.-

Prelazimo na 3-ću tačku dnevnog reda: Nacrt Zakona o inspekcijama u Bosansko-podrinjskom kantonu Goražde, a tačka 2. je ostala otvorena.

Nacrt Zakona o inspekcijama u Bosansko-podrinjskom kantonu Goražde smo dobili. Nacrt Zakona u redovnu proceduru dostavila je Vlada Bosansko-podrinjskog kantona Goražde.

Uvodno obrazloženje po Nacrtu Zakona o inspekcijama u Bosansko-podrinjskom kantonu Goražde dao je direktor Kantonalne uprave za inspeksijske poslove Hadžiomerović Mithat.

U diskusiji, po Nacrtu Zakona o inspekcijama u Bosansko-podrinjskom kantonu Goražde učestvovali su: Alija Begović, Mesud Kumro, Bajro Obuća, Mehmed Turčalo, Emir Frašto, Redžo Bašić i Salko Podrug.

Begović Alija – predsjedavajući Skupštine

Pošto se niko više ne javlja za riječ, zaključujem raspravu po Nacrtu Zakona o inspekcijama u Bosansko-podrinjskom kantonu Goražde i predlažem da Skupština Bosansko-podrinjskog kantona Goražde donese slijedeći:

Z a k l j u č a k

1/ Utvrđuje se Nacrt Zakona o inspekcijama u Bosansko-podrinjskom kantonu Goražde i upućuje na javnu raspravu.

2/ Javnu raspravu će sprovesti: Kantonalna uprava za inspeksijske poslove, Ustavna i zakonodavno-pravna komisija Skupštine Bosansko-podrinjskog kantona Goražde i Komisija za bezbjednost, nadzor nad radom policije, borbu protiv korupcije i pitanja iz nadležnosti inspeksijskih organa Skupštine Bosansko-podrinjskog katnona Goražde.

3/ Javnu raspravu sprovesti sa svim zainteresovanim institucijama u sve tri općine u sastavu Bosansko-podrinjskog kantona Goražde.

4/ Rok za sprovođenje javne rasprave je do 60 dana.

/Sjednici prisustvuje 21 poslanik/

Ko je za ovakav zaključak, molim, da digne ruku? /21 poslanik/

Ima li neko protiv? /Niko/

Da li se neko uzdržao? /Niko/

Konstatiram da je Skupština Bosansko-podirnjskog kantona Goražde, jednoglasno, sa 21 glasom „za“ donijela slijedeći:

Z a k l j u č a k

1/ Utvrđuje se Nacrt Zakona o inspekcijama u Bosansko-podrinjskom kantonu Goražde i upućuje na javnu raspravu.

2/ Javnu raspravu će sprovesti: Kantonalna uprava za inspeksijske poslove, Ustavna i zakonodavno-pravna komisija Skupštine Bosansko-podrinjskog kantona Goražde i Komisija za bezbjednost, nadzor nad radom policije, borbu protiv korupcije i pitanja iz nadležnosti inspeksijskih organa Skupštine Bosansko-podrinjskog katnona Goražde.

3/ Javnu raspravu sprovesti sa svim zainteresovanim institucijama u sve tri općine u sastavu Bosansko-podrinjskog kantona Goražde.

4/ Rok za sprovođenje javne rasprave je do 60 dana.

T a č k a 7.-

Prelazimo na 7-mu tačku dnevnog reda: Prijedlog Deklaracije o ravnopravnosti Bosansko-podrinjskog kantona Goražde u Federaciji Bosne i Hercegovine.

Uvodno obrazloženje po Prijedlogu Deklaracije o ravnopravnosti Bosansko-podrinjskog kantona Goražde u Federaciji Bosne i Hercegovine dao je predlagač Deklaracije Ibrahim Imamović.

T e k s t D e k l a r a c i j e g l a s i:

U skladu sa članom 110. Poslovnika Skupštine Bosansko-podrinjskog kantona Goražde /"Službene novine Bosansko-podrinjskog kantona Goražde", broj: 10/08/, od 30. juna 2008. godine, Skupština Bosansko-podrinjskog kantona Goražde, na 37-moj redovnoj sjednici, održanoj 30. juna 2010. godine, **d o n o s i:**

DEKLARACIJU

Skupština Bosansko-podrinjskog kantona Goražde podsjeća da deset ravnopravnih kantona čine Federaciju Bosne i Hercegovine.

Bosansko-podrinjskom kantonu Goražde od početka uspostave Federacije Bosne i Hercegovine, podjelom prihoda i drugim oblicima preraspodjele ovlaštenja nisu obezbjeđeni neophodni resursi dovoljni da bude u stanju da samostalno kreira svoje politike i za njih preuzima punu odgovornost.

Gradjani Istočne Bosne ovom Deklaracijom traže od političkih partija, zakonodavne i izvršne vlasti Federacije Bosne i Hercegovine da izgradjuju sistem raspodjele tako da siromašniji kantoni imaju primjerene resurse da se u politici opredjeljuju kao i oni bogatiji.

Zalažemo se, pored izgradnje sistema solidarnosti, da se razdvoje odgovornosti sa dva nivoa u interesu transparentnosti, odgovornosti i efikasnosti. Ovo se odnosi kako na funkcije, tako i na fiskalna ovlaštenja s ciljem da se nadje jasnoća i bolja fiskalna ekvivalentnost.

Zahtjevamo od svih institucija Federacije Bosne i Hercegovine i Bosansko-podrinjskog kantona Goražde da u svom djelovanju dosljedno poštuju ustavne ovlasti, specifičnu situaciju u Bosansko-podrinjskom kantonu Goražde uvažavajući opšte interese i fleksibilnost u provedbi svake ovlasti na oba nivoa.

Naglašavamo da su Skupština, Vlada i svi organi Bosansko-podrinjskog kantona Goražde, u bilo kojoj situaciji kada federalni organi ne izvršavaju svoje ovlasti ili se odriču tih ovlasti u korist trećih, a odnose se na resurse Bosansko-podrinjskog kantona Goražde, obavezni, u najkraćem roku, preuzeti te ovlasti u punom kapacitetu.

PREDSJEDAVAJUĆI SKUPŠTINE

Alija Begović

U diskusiji, po Pijedlogu Deklaracije o ravnopravnosti Bosansko-podrinjskog kantona Goražde u Federaciji Bosne i Hercegovine učestvovali su: Ibrahim Imamović, Alija Begović, Mehmed Turčalo i Jasmin Ferhatović.

Bajro Obuća – Klub poslanika Socijaldemokratske partije je ovu Deklaraciju uputio u skupštinsku proceduru na 34-toj redovnoj sjednici Skupštine Bosansko-podrinjskog kantona Goražde. Danas je 37- ma redovna sjednica, prema tome to je bilo prije neka 3 mjeseca. Svi smo imali, ovo sebi prvo govorim, dovoljno vremena i mogućnosti da na ovu Deklaraciju koja je upućena u skupštinsku proceduru damo i tehničke, političke i svake druge primjedbe, prijedloge i sugestije ako smo htjeli. Što se tiče Deklaracije koja je predložena možda u jezičkom, leksičkom smislu ona bi se mogla dotjerati. Kad sam već izašao u stavu 1. iza Goražde je suvišno to treba brisati. Ustavu 3. građani Istočne Bosne ili građani Bosansko-podrinjskog kantona Goražde, meni je primjerenije, obzirom da je Deklaracija na sjednici Skupštine Bosansko-podrinjskog kantona Goražde da umjesto „građani istočne Bosne“, upišemo: „građani Bosansko-podrinjskog kantona Goražde“, iako ovo istočne Bosne nije slučajno, ja razumijem zašto je predlagač stavio ovo istočne Bosne, zato što su građani jednog šireg područja naslonjeni na Bosansko-podrinjski kanton Goražde, tako da u suštini može i ovaj termin ostati. U predzadnjem stavu riječ “obadva“ da se briše i da se upiše riječ „oba“ nivoa.

Mehmed Turčalo – U ime Kluba Stranke za Bosnu i Hercegovinu tražim pauzu od 30 minuta.

Begović Alija – predsjedavajući Skupštine

Dajem pauzu do 15:00 sati.

/Završena pauza/

Begović Alija – predsjedavajući Skupštine

G dine Turčalo Vi ste tražili pauzu, je li ima potrebe da se obratite?

Turčalo Turčalo – Ova Deklaracija koja je danas pročitana iz nje se nema šta posebno ni izbaciti, ni u nju dopisati, mi ćemo nju podržati ovakva kakva je, ali mora onaj i koje podržao i koje napisao smatrati paravanom iza koga se sakrio rad, odnosno nerad ove Vlade i ove skupštinske većine. Ako to budete priznali mi u tom slučaju takvu Deklaraciju prihvatamo, ali ćemo do kraja ovog mandata, još će biti 2-3 sjednice na svakoj ćemo vas pokušati provjeriti dokle se je lekcija naučila.

Begović Alija – predsjedavajući Skupštine

Završilo smo pauzu, čuli smo predsjednika Kluba Stranke za Bosnu i Hercegovinu. Što se tiče Deklaracije čuli smo nekoliko konkretnih primjedbi od g-dina Obuće da se neke riječi popravne, znači tehničke popravke i sekretar Vlade je korigovao tekst Deklaracije. Možemo li zamoliti sekretara Vlade da nam pročita Deklaraciju ako se g-din Imamović slaže? Slažete se.

Sijerčić Emir - sekretar Vlade Bosansko-podrinjskog kantona Goražde

Vezano za Deklaraciju, mislim da će se ista usvajati i slati na adrese u Federaciji i iz tog razloga sam smatrao da se neke stvari leksički i gramatički urade, da to bude neka vrsta teksta koji će imati jedan svoj kvalitet, osim onog kvantiteta što je u njemu rečeno.

D e k l a r a c i j a b i g l a s i l a :

Skupština Bosansko-podrinjskog kantona Goražde podsjeća da deset ravnopravnih kantona čine Federaciju Bosne i Hercegovine.

Bosansko-podrinjskom kantonu Goražde, od početka uspostave Federacije Bosne i Hercegovine, podjelom prihoda i drugim oblicima preraspodjele ovlaštenja, nisu obezbjedjeni neophodni resursi dovoljni da budu u stanju da samostalno kreira svoje politike i za njih preuzima punu odgovornost.

Gradjani Bosansko-podrinjskog kantona Goražde, ovom Deklaracijom, traže od političkih partija, zakonodavne i izvršne vlasti Federacije Bosne i Hercegovine da izgrađuju sistem raspodjele, tako da siromašniji kantoni imaju primjerene institucionalne kapacitete da se u politici opredjeljuju kao i razvijeniji kantoni.

Zalažemo se, pored izgradnje sistema solidarnosti, da se razdvoje odgovornosti sa dva nivoa u interesu transparentnosti, odgovornosti i efikasnosti. Ovo se odnosi kako na funkcije, tako i na fiskalna ovlaštenja, s ciljem da se nadje jasnija i bolja fiskalna ekvivalentnost.

Zahtjevamo od svih institucija Federacije Bosne i Hercegovine i Bosansko-podrinjskog kantona Goražde da, u svom djelovanju dosljedno poštuju ustavne ovlasti, specifičnu situaciju u Bosansko-podrinjskom kantonu Goražde, uvažavajući opšte interese i fleksibilnost u provedbi svake ovlasti na oba nivoa vlasti.

Naglašavamo da su Skupština, Vlada i svi organi Bosansko-podrinjskog kantona Goražde, u bilo kojoj situaciji, kada federalni organi ne izvršavaju svoje ovlasti ili se odriču tih ovlasti u korist trećih, a odnose se na resurse Bosansko-podrinjskog kantona Goražde, obavezni, u najkraćem roku, preuzeti te ovlasti u punom kapacitetu.

PREDSJEDAVALJUĆI SKUPŠTINE

Alija Begović

Begović Alija – predsjedavajući Skupštine

Pošto se niko više ne javlja za riječ, zaključujem raspravu po Prijedlogu Deklaracije o ravnopravnosti Bosansko-podrinjskog kantona Goražde u Federaciji Bosne i Hercegovine i stavljam na izjašnjavaње Deklaraciju kao u tekstu što je pročitao g-din Sijerčić?

Ko je za ovakvu Deklaraciju, molim, da digne ruku? /21 poslanik/
Ima li neko protiv? /Niko/
Da li se neko uzdržao? /Niko/

Konstatiram da je Skupština Bosansko-podrinjskog kantona Goražde, jednoglasno, sa 21 glasom „za“ donijela Deklaraciju o ravnopravnosti Bosansko-podrinjskog kantona Goražde u Federaciji Bosne i Hercegovine.

Tačka 2.-

Begović Alija – predsjedavajući Skupštine

Vraćamo se na tačku 2. Prijedlog Zakona o unutrašnjim poslovima Bosansko-podrinjskog kantona Goražde.

Pauzu smo napravili kako bi se Vlada Bosansko-podrinjskog kantona Goražde očitovala o amandmanima koji su istaknuti u toku rasprave i onih koji su dostavljeni prije.

Nusret Sipović - ministar unutrašnjih poslova Bosansko-podrinjskog kantona Goražde

Vlada Bosansko-podrinjskog kantona Goražde je u međuvremenu razmatrala predložene amandmane, i mogu reći da su na toj sjednici prisustvovali predstavnici EUPM-a i OHR-a, koji su oko nekih pitanja i konsultovani i većina amandmana je prihvaćena. Neki od amandmana nisu prihvaćeni i obrazložićemo zašto.

Vežano za predložene amandmane od strane Komisije za bezbjednost, nadzor nad radom policije, borbu protiv korupcije i pitanja iz nadležnosti inspeksijskih organa Skupštine Bosansko-podrinjskog kantona Goražde bilo je ukupno 5. amandmana, prihvaćeni su Amandman 1., 3., 4. i 5., dok Amandman 2. nije prihvaćen.

Vi ste dobili ranije ove amandmane, svi poslanici to imaju i mogu vidjeti o čemu se radi, šta je prihvaćeno, a šta ne.

Što se tiče amandmana Stranke za Bosnu i Hercegovinu prvi, odnosno šesti po redu Amandman gledajući amandmane ove Komisije koji se odnosio na izmjenu člana 25. stav (c), i predloženo je da se taj stav (c) izmijeni i da glasi: „jedan bivši policijski službenik sa najmanje 10 godina iskustva na rukovodnom radnom mjestu“. Ovaj Amandman Vlada nije prihvatila iz razloga što je smatrala da se ovim Amandmanom sužuje krug potencijalnih kandidata za ovu poziciju sa jedne

strane, a s druge strane da osobu koja ima 10 godina iskustva na rukovodnom radnom mjestu u policiji ništa ne sprečava u koliko ima bar VI stepen školske spreme završen da može da aplicira na ovu poziciju.

Amandman 2., odnosno Amandman 7. po redu je bio da se iza stav 3. u članu 68. iza riječi Ministarstva umjesto tačke stavi zarez i dodaju riječi: „a saglasnost na isti daje Vlada Bosansko-podrinjskog kantona Goražde“. Ovdje se mislilo na Pravilnik o priznanjima, pohvalama i nagradama koje dodjeljuje ministar i komesar policije i Vlada je smatrala da je ovo korektan Amandman i prihvatila ga je.

Poslednji Amandman, Amandman 8. predložen od strane g-dina Dževada Terovića koji je podrazumijevao izmjenu člana 40., nije prihvaćen iz razloga što je ako pogledate pismo g-dina Dominika Peterne zamjenika šefa Misije, u tom pismu su pobrojani glavni principi zakona koji ne bi trebali biti promjenjeni, a između ostalog je navedeno imenovanje i postupak smjene policijskog komesara. Vlada Bosansko-podrinjskog kantona Goražde smatra da je član 40. princip koji se tiče imenovanja policijskog komesara i iz tog razloga ovaj Amandman nije prihvaćen.

Begović Alija – predsjedavajući Skupštine

Zahvaljujem. Pozivam predlagače čiji su amandmani odbijeni da se očituju, da li insistiraju na izjašnjanju o ovim amandmanima ili odustaju.? Klub Stranke za Bosnu i Hercegovinu odustaje.

Envera Džemidžić – Dozvolite mi da u ime Komisije za bezbjednost, nadzor nad radom policije, borbu protiv korupcije i pitanja iz nadležnosti inspeksijskih organa Skupštine Bosansko-podrinjskog kantona Goražde ovaj Amandman 2. koji je odbijen da ide na izjašnjanje.

Dževad Terović – Takođe i moj Amandman da ide na izjašnjanje.

Nazif Uruči – premijer Bosansko-podrinjskog kantona Goražde

Mislim da je ministar pojasnio ovo pitanje iz člana 40. i da je jasno da odstupa od principa na kojima su pravljene izmjene Zakona, to je jedno. Drugo, Amandman 2. o tome ko će obavljati administrativne poslove za Nezavisni odbor, u samom Zakonu piše ko servisira ta tijela, prema tome to bi bio dupliranje, i zbog toga Amandman nije prihvaćen, samo zato što je formalno Amandman, zapravo stav je da sekretarijat Skupštine Bosansko-podrinjskog kantona Goražde za opsluživanje i rad Nezavisnog odbora odredi lice koje će to raditi, i naravno, da Administrativna komisija utvrdi naknadu za taj rad. Obzirom da se radilo o Amandmanu, onda je morao biti odbijen, jer to ne sadrži elemente one koji bi bili u skladu sa Zakonom.

Begović Alija – predsjedavajući Skupštine

U tom slučaju sadržaj Amandmana će se poštovati i primjenjivati, ali integritet Zakona ne dozvoljava ako sam shavatio premijera, mislim da trebamo da ispoštujemo ove osnovne principe i harmonizaciju.

Da li Komisija i dalje nakon objašnjenja insistira na izjašnjanju, mislim da je objašnjenje vrlo logično i prihvatljivo. Ja sam isto bio taj koji podražava Amandman, ali mislim da možemo prihvatiti objašnjenje premijera.

Envera, Vi ste u ime Komisije i tražite da se izjasnimo o Amandmanu?

Stavljam na izjašnjanje 2-gi Amandman Komisije za bezbjednost, nadzor nad radom policije, borbu protiv korupcije i pitanja iz nadležnosti inspeksijskih organa Skupštine Bosansko-podrinjskog kantona Goražde.

Bajro Obuća – postavio je pitanje predstavniku OHR-a, koje se odnosilo na 2-gi Amandman Komisije za bezbjednost, nadzor nad radom policije, borbu protiv korupcije i pitanja iz nadležnosti inspekcijskih organa Skupštine Bosansko-podrinjskog kantona Goražde.

Senad Zlatar - predstavnik OHR-a

/Odgovorio je na pitanje poslanika Bajra Obuće/.

Envera Džemidžić – Ja poštujem prisustvo ljudi koji su pomogli da se donese ovaj Zakon. Najvjerovatnije da će biti usvojen od većine poslanika. Zašto je Komisija to uradila? Zašto je predložila ovako? U članu 32. stav 3. iza riječi „obavlja“ dodaju se riječi: „tehnički sekretar Nezavisnog odbora koga imenuje Nezavisni odbor na prijedlog sekretara Skupštine Bosansko-podrinjskog kantona Goražde. Naknadu sekretaru Nezavisnog odbora utvrđuje Komisija za budžet, finansije i administrativna pitanja Skupštine Bosansko-podrinjskog kantona Goražde“. Ostali tekst u stavu 3. se briše. I Nezavisnom odboru naknadu utvrđuje Komisija za budžet, finansije i administrativna pitanja. Nije pomenuto da sekretarijat imenuje. Ovdje je specifičnost našeg Kantona u sekretarijatu Skupštine je samo 3 uposlenih. Ljudi su prebukirani poslom i zašto ne ispoštovati ovo, mi iz Komisije, mi poslanici najbolje znamo koliko to 3 ljudi radi tamo. Zašto ne ispoštovati to kao što je bilo u ranijem Zakonu, mislim da se suštinski ništa ne mijenja. Ja ostajem pri svom prijedlogu da se Skupština izjasni o Amandmanu 2. Komisije za bezbjednost, nadzor nad radom policije, borbu protiv korupcije i pitanja iz nadležnosti inspekcijskih organa.

Begović Alija – predsjedavajući Skupštine

Ko je za ovaj Amandman, molim, da digne ruku? /13 poslanika/

Ima li neko protiv? /1 poslanik/

Da li se neko uzdržao? /7 poslanika/

Konstatiram da je Skupština Bosansko-podrinjskog kantona Goražde, sa 13 glasova „za“, 1 glasom „protiv“ i 7 „suzdržanih“ glasova usvojila 2. Amandman Komisije za bezbjednost, nadzor nad radom policije, borbu protiv korupcije i pitanja iz nadležnosti inspekcijskih organa Skupštine Bosansko-podrinjskog kantona Goražde, a koji glasi: U članu 32. stav 3. iza riječi: “obavlja” dodaju se riječi: “tehnički sekretar Nezavisnog odbora koga imenuje Nezavisni odbor na prijedlog sekretara Skupštine Bosansko-podrinjskog kantona Goražde. Naknadu sekretaru Nezavisnog odbora utvrđuje Komisija za budžet, finansije i administrativna pitanja Skupštine Bosansko-podrinjskog kantona Goražde”. Ostali tekst u stavu 3. se briše. Amandman postaje sastavni dio Zakona o unutrašnjim poslovima Bosansko-podrinjskog kantona Goražde.

Amandman g-dina Terovića glasi:

Članom 40. pomenutog Prijedloga Zakona predloženo je:

1/ „Najkasnije u roku od 8 dana od dana prijema rezultata odabira od Nezavisnog odbora iz člana 39. ovog Zakona, ministar upućuje obrazložen prijedlog sa imenom jednog od predloženih kandidata Vladi Kantona na imenovanje“.

2/ „Ukoliko ministar ne uputi prijedlog kandidata u roku iz stava 1. ovo člana Nezavisni odbor dostavlja prijedlog sa imenima dva kandidata direktno Vladi koja će imenovati jednog od kandidata za policijskog komesara“.

Predlažem da član 40. glasi:

1/ „Najkasnije u roku od 8 dana od prijema rezultata odabira od Nezavisnog odbora, ministar upućuje prijedlog jednog kandidata Vladi na imenovanje“.

2/ „Ukoliko prijedlog nije podnesen u roku predviđenom u stavu 1. ovog člana Nezavisni odbor će dostaviti prijedlog direktno Vladi, koja će imenovati kandidata za policijskog komesara“.

Ko je za ovaj Amandman, molim, da digne ruku? /8 poslanika/

Ima li neko protiv? /3 poslanika/

Da li se neko uzdržao? /10 poslanika/

Konstatiram da Skupština Bosansko-podrinjskog kantona Goražde, sa 8 glasova „za“, 3 glasa „protiv“ i 10 „suzdržanih“ glasova nije usvojila Amandman g-dina Dževada Terovića.

Ostaje da se izjasnimo o Prijedlogu Zakonu o unutrašnjim poslovima Bosansko-podrinjskog kantona Goražde uz amandmane koje je Vlada prihvatila i Amandman koji je izglasala Skupština Bosansko-podrinjskog kantona Goražde

/Sjednici prisustvuje 22 poslanika/

Ko je za, molim, da digne ruku? /21 poslanik/

Ima li neko protiv? /Niko/

Da li se neko uzdržao? /1 poslanik/

Konstatiram da je Skupština Bosansko-podrinjskog kantona Goražde, sa 21 glasom „za“, niko „protiv“ i 1 „suzdržanim“ glasom donijela Zakon o unutrašnjim poslovima Bosansko-podrinjskog kantona Goražde.

Ovim smo apsolvirali tačku 2. i 7.

Tačke 4., 5. i 6.-

Prelazimo na 4-tu tačku dnevnog reda: Izvještaj o radu Vlade Bosansko-podrinjskog kantona Goražde za 2009. godinu.

Dževad Terović – predložio je da se tačke 4., 5. i 6 raspravljaju zajedno, a da se o njima glasa pojedinačno.

Begović Alija – predsjedavajući Skupštine

Čuli ste prijedlog g-dina Terovića da se tačke 4., 5. i 6. raspravljaju zajedno, a da se o njima glasa pojedinačno.

Ko je za ovakav prijedlog, molim, da digne ruku? /22 poslanika/

Ima li neko protiv? /Niko/

Da li se neko uzdržao? /Niko/

Konstatiram da je Skupština Bosansko-podrinjskog kantona Goražde jednoglasno, sa 22 glasa „za“ usvojila prijedlog Dževada Terovića da se tačke 4., 5. i 6. zajedno raspravljaju, a da se o njima glasa pojedinačno.

Obrazloženje po Izvještaju o izvršenju Budžeta Bosansko-podrinjskog kantona Goražde za 2009. godinu, dao je ministar za finansije u Vladi Bosansko-podrinjskog kantona Goražde Muhidin Pleh.

Begović Alija – predsjedavajući Skupštine

Ja ću još jednom pozvati da li predlagač ima potrebu da obrazloži ove tri tačke koje smo dobili u materijalima? Da li su radna tijela razmatrala ove materijale, imamo li stavove? Otvaram raspravu po tačkama 4., 5. i 6.

U diskusiji po izvještaju o radu Vlade Bosansko-podrinjskog kantona Goražde za 2009. godinu, Izvještaju o izvršenju Budžeta Bosansko-podrinjskog kantona Goražde za 2009. godinu i Izvještaju budžetske rezerve Bosansko-podrinjskog kantona Goražde za period 01.01. – 31.12.2009. godine, učestovali su: Mehmed Turčalo, Damir Žuga, Dževad Terović, Ibrahim Imamović i Mesud Kumro.

Pošto se niko više ne javlja za riječ, zaključujem raspravu po Izvještaju o radu Vlade Bosansko-podrinjskog kantona Goražde za 2009. godinu i predlažem da Skupština Bosansko-podrinjskog kantona Goražde donese slijedeći:

Z a k l j u č a k

Usvaja se Izvještaj o radu Vlade Bosansko-podrinjskog kantona Goražde za 2009. godinu.

Ko je za, molim, da digne ruku? /13 poslanika/
Ima li neko protiv? /4 poslanika/
Da li se neko uzdržao od glasanja? /5 poslanika/

Konstatiram da je Skupština Bosansko-podrinjskog kantona Goražde sa 13 glasova „za“, 4 glasa „protiv“ i 5 „suzdržanih“ glasova donijela Izvještaj o radu Vlade Bosansko-podrinjskog kantona Goražde za 2009. godinu.

Begović Alija – predsjedavajući Skupštine

Pošto se niko više ne javlja za riječ, zaključujem raspravu po Izvještaju o izvršenju Budžeta Bosansko-podrinjskog kantona Goražde za 2009. godinu i predlažem da Skupština Bosansko-podrinjskog kantona Goražde donese slijedeći:

Z a k l j u č a k

Donosi se Izvještaj o izvršenju Budžeta Bosansko-podrinjskog kantona Goražde za 2009. godinu.

Ko je za, molim, da digne ruku? /15 poslanika/
Ima li neko protiv? /3 poslanika/
Da li se neko uzdržao od glasanja? /4 poslanika/

Konstatiram da je Skupština Bosansko-podrinjskog kantona Goražde sa 15 glasova „za“, 3 glasa „protiv“ i 4 „suzdržana“ glasa donijela Izvještaj o izvršenju Budžeta Bosansko-podrinjskog kantona Goražde za 2009. godinu

Pošto se niko više ne javlja za riječ, zaključujem raspravu po Izvještaju o utrošku budžetske rezerve Bosansko-podrinjskog kantona Goražde za period 01.01. – 31.12. 2009. godinu i predlažem da Skupština Bosansko-podrinjskog kantona Goražde donese slijedeći:

Z a k l j u č a k

Donosi se Izvještaj o utrošku budžetske rezerve Bosansko-podrinjskog kantona Goražde za period 01.01. -31.12.2009. godine.

Ko je za, molim, da digne ruku? /15 poslanika/
Ima li neko protiv? /2 poslanika/
Da li se neko uzdržao od glasanja? /5 poslanika/

Konstatiram da je Skupština Bosansko-podrinjskog kantona Goražde sa 15 glasova „za“, 2 glasa „protiv“ i 5 „suzdržanih“ glasova donijela Izvještaj o utrošku budžetske rezerve Bosansko-podrinjskog kantona Goražde za period 01.01. – 31.12.2009. godine.

Mislim da je Klub Socijaldemokratske partije izjasnio potrebu da bude prisutan na nekim događajima /sahrana, dženaza/, a i dogovorili smo se prekinućemo sjednicu, a o nastavku ćemo Vas obavijestiti.

/Sjednica Skupštine Bosansko-podrinjskog kantona Goražde prekinuta je u 16:35 sati/.

SEKRETAR SKUPŠTINE

Bašić Midhat

PREDSJEDAVAJUĆI SKUPŠTINE

Begović Alija